

蘇州府志



卷之四十七 人物一	卷之四十八 人物二	卷之四十九 人物三
--------------	--------------	--------------

漢書門	九〇八三	類
一〇八三	四三	號
三二	一四	函
三二	一四	架
三二	一四	冊

二十

九〇八三	內閣文庫
番號 漢 9083	
冊數 32 (20)	
函號 292 13	

九〇八三
六三三



蘇州府志卷第四十七

蘇州府志卷第四十七

蘇州府志卷第四十七

人物一

吳縣

淺草文庫

吳中人物自三國六朝顧陸朱張諸巨族顯名奕世盛矣
唐時漸分屬邑宋代舊姓稀見僑寓滋多至明而各邑土
著稱極盛焉庶幾唐景所云家無不孝之子朝無不忠之
臣文為儒宗武為將帥者乎舊志紛列名目或一家父子
兄弟卷帙隔絕今惟分統以縣差次以時俾閱者按籍可
稽其流寓藝術釋老三者仍分著焉

周

季札吳子壽夢子壽夢有四子長諸樊次餘祭次餘昧次季札

蘇州府志

卷四十七

人物一

季札賢而壽夢欲立之季札讓不可乃立諸樊攝行事當國諸樊已除喪讓位季札季札棄其室而耕乃舍之諸樊卒命授弟餘祭欲傳以次必致國於季札而止餘祭卒弟餘昧立餘昧卒欲授季札季札逃去乃立餘昧之子僚季札封延陵

故號延陵季子

史記吳太伯世家

吳郡志春秋時人物有慶忌被離要離壽越蹶由掩餘燭庸夫槩子洩胥門巢王子姑曹展如太子友等十餘人姑蘇志又有屈狐庸張胥鄙譚夫吾吳赤市四人皆採之左傳吳越春秋說苑新序諸書慶忌一勇之夫要離刺客之流夫槩歸而自王載之非所以垂訓其餘諸人始末難考未知果皆吳產否要之三代時人亦不藉郡志而傳通志畧之是也因舊志皆載附見其名於此又盧王諸志高行類載被裘公吳人也延陵季子出遊見路有遺金當夏五月有被裘而薪者季子呼薪者曰取彼地金薪者投鎌於地瞋目拂手而言曰何子居之高視之下儀貌之壯語

言之野也吾五月被裘而薪豈取金者哉季子謝之請問姓氏薪者曰子皮相之士也何足語姓名遂去不顧事見魏隸高士傳然初學記引吳越春秋則云季札去徐而歸道逢男子五月被裘採薪云云則亦非吳人也今以無確証亦附見焉

漢

角里先生漢高帝時與東園公綺里季夏黃公俱出定太子稱為四皓史記索隱角里先生河內軹人太伯之後姓周名術字元道京師號曰霸上先生一日角里先生孔父秘記作祿里王劭據周氏世譜為此說史記正義今太湖洞庭山西南有祿里村是

嚴忌吳人吳王濞招致四方遊士忌與鄒陽枚乘等俱仕吳以

文辨著名久之吳王以太子事怨望陰有邪謀忌知不可說
去之梁從孝王游號嚴夫子

漢書鄒陽
枚乘傳

嚴助會稽吳人嚴夫子子或言族家子也郡舉賢良對策百餘
人武帝善助對獨擢助為中大夫是時征伐四夷開邊置郡
軍旅數發內收制度朝廷多事屢舉賢良文學之士上令助
等與大臣辨論中外相應以義理之文大臣數詘其尤親幸
者東方朔枚臯嚴助吾邱壽王司馬相如相如嘗稱疾避事
朔臯不根持論上頗俳優畜之惟助與壽王見任用而助最
先進建元三年閩越圍東甌東甌告急帝遣助以節發兵會
稽浮海救東甌未至閩越引兵罷後三歲閩越復興兵擊南

越南越守天子約不敢擅發兵而上書以聞上多其義大為
發興遣兩將軍將兵誅閩越淮南王安上書諫時漢兵遂出
踰嶺適會閩越王弟餘善殺王以降漢兵罷上嘉淮南之意
美將卒之功廼令助諭意風指於南越南越即遣太子隨助
入侍助還又諭淮南告王越事與淮南王相結而還上大悅
助侍燕從容上問助居鄉里時助對曰家貧為友壻富人所
辱上問所欲對願為會稽太守於是拜為會稽太守數年不
聞問賜書曰制詔會稽太守君厭承明之廬勞侍從之事懷
故土出為郡吏會稽東接於海南近諸越間者濶焉久不聞
問具以春秋對母以蘇秦從橫助恐上書謝願奉三年計最

詔許因留侍中有奇異輒使爲文及作賦頌數十篇後淮南王來朝厚賂遺助交私論議及淮南反事與助相連上薄其罪欲勿誅張湯爭不可助竟棄市

漢書

朱買臣字翁子吳人家貧好讀書不治產業常艾薪樵賣以給食擔束薪行且誦書其妻亦負戴相隨數止買臣母歌嘔道中買臣愈益疾歌妻羞之求去買臣笑曰吾年五十當富貴今已四十餘矣女苦日久待我富貴報女功妻恚怒曰如公等終餓死溝中耳何能富貴買臣不能留卽聽去其後買臣獨行歌道中負薪慕閒故妻與夫家俱上冢見買臣飢寒呼飯飲之後數歲買臣隨上計吏爲卒將重車至長安詣闕上

書久不報待詔公車糧用乏上計吏卒更乞匄之會邑子嚴助貴幸薦買臣召見說春秋言楚辭帝甚悅之拜爲中大夫與助俱侍中是時方築朔方公孫弘諫上使買臣難訕弘後買臣坐事免久之召待詔時東越數反覆買臣因言故東越王居保泉山一人守險千人不得上今聞東越王更徙處南行去泉山五百里居大澤中今發兵浮海直指泉山陳舟列兵席卷南行可破滅也上拜買臣會稽太守上謂買臣曰富貴不歸故鄉如衣錦夜行今子何如買臣頓首謝詔買臣到郡治樓船備糧食水戰具須詔書到軍與俱進初買臣免待詔嘗從會稽守邸者寄食拜爲太守買臣衣故衣懷其印綬

步歸郡邸直上計時會稽吏方相與羣飲不視買臣買臣入室中守邸與共食少見其綬守邸怪之前引其綬視其印會稽太守章也守邸驚白守丞相推排陳列中庭拜謁買臣徐出戶有頃長安廩吏乘駟馬車來迎買臣遂乘傳去會稽聞太守且至發民除道縣吏並送迎車百餘乘入吳界見其故妻妻夫治道買臣駐車呼令後車載其夫妻到太守舍置園中給食之居一月妻自經死買臣乞其夫錢令葬悉召見故人與飲食諸嘗有恩者皆報復焉居歲餘買臣受詔將兵與韓說等俱擊破東越有功徵入爲主爵都尉數年坐法免復爲丞相長史張湯爲御史大夫始買臣與嚴助俱侍中貴用

事湯尙爲小吏趨走買臣等前後湯以廷尉治淮南獄排陷嚴助買臣怨湯及買臣爲長史湯數行丞相事知買臣素貴故陵折之買臣見湯坐床上弗爲禮買臣深怨常欲死之後遂告湯陰事湯自殺上亦誅買臣買臣子山拊官至郡守右

扶風

漢書

顧翱少失父事母孝母好食雕胡飯常率子女躬自採擷還家導水鑿川供養每有盈儲家近太湖湖中乃生雕胡無復雜草蟲鳥不敢至遂得以爲養郡縣表其閭舍

西京雜記

龍邱萇吳人隱居太末志不降辱王莽時四輔三公連辟不到更始時任延爲會稽都尉掾吏白請召之延曰龍邱先生躬

德履義有原憲伯夷之節都尉灑掃其門猶懼辱焉召之不
可遣功曹奉謁修書記致醫藥吏使相望於道積歲甚乃乘
輦詣府門願先死備錄延辭讓再三遂署議曹祭酒甚尋病
卒延自臨殯不朝三日郡中賢士大夫爭往弔焉後漢書
任延傳

陸閔字子春吳縣人暢之子也世為族姓篤行好學聰明有令

德選尚寧平公主辭疾不應為潁川太守致鳳凰甘露之瑞

建武中為尚書令閔姿容如玉喜著越布單衣光武升臺見

之歎曰南方固多佳人自是嘗敕會稽郡獻越布焉謝承後
漢書

臯弘字奉卿吳郡人家代為冠族少有英才與桓榮俱習歐陽

尚書事博士九江朱普世祖時榮拜議郎會歐陽博士缺帝

欲用榮榮叩頭讓曰臣經術淺薄不如同門生郎中彭閔揚

州從事臯弘因拜榮為博士引閔弘為議郎弘子徽至司徒

長史謝承後漢書范書合纂 又梁鴻傳鴻至吳依大家臯
伯通居廡下為人賃舂伯通察而異之舍之於家及鴻

卒伯通葬之於要離冢傍寰宇記今臯橋即伯通
所居當是奉卿之族人舊志謂伯通字奉卿誤

陸續字智初閔孫幼孤仕郡戶曹史時歲荒民飢困太守尹興

使續於都亭賦民饘粥續悉簡閱其民訊以名氏事畢興問

所食幾何續因口說六百餘人皆分別姓氏無有差謬興異

之刺史行部見續辟為別駕從事以病去還為郡門下掾時

楚王英陰疏天下善士及楚事覺顯宗得其錄有尹興名乃

徵興詣廷尉獄續與主簿梁宏功曹史駟勲及掾史五百餘

人詣洛陽詔獄就考諸吏不堪痛楚死者大半惟續宏勳掠考五毒肌肉消爛終無異辭續母遠至京師覘候消息獄事特急無緣與續相聞母但作饋食付門卒以進續雖見考苦毒而辭色慷慨未嘗易容惟對食悲泣不能自勝使者怪而問其故續曰母來不得相見故泣耳使者大怒以為門卒通傳意氣召將案之續曰因食餉羹識母所自調和故知來耳非人告也使者問何以知母所作乎續曰母截肉未嘗不方斷葱以寸為度是以知之使者問諸謁舍續母果來於是陰嘉之上書說續行狀帝即赦興等事還田里禁錮終身續以老病卒長子稠廣陵太守有理名中子逢樂安太守少子褒

力行好學不慕榮名連徵不就褒子康

後漢書

按陸氏自續康以下遜抗機雲諸人史傳但云吳人吳郡志盧王志人物內並載明一統志以陸機有華亭鶴唳之語并前後諸陸皆移入松江府新通志因之考八王故事曰華亭吳由拳縣郊外墅也有清泉茂林吳亡後陸機兄弟共遊於此十餘年寰宇記引吳地記云二陸宅在長谷谷名華亭陸機歎處昔陸遜陸凱居此谷吳志云漢廬江太守陸康與袁術有隙使姪遜與其子績率宗族避難於是谷是則居華亭者自遜始康以前未嘗居也陸績故居在臨頓里唐史可考世說載賀邵為吳郡太守至諸屯邸檢校顧陸役使官兵及藏逋亡諸陸屯邸未必皆遠在華亭又蘇峻東征與陸邁俱將至吳密敕左右入閭門放火邁曰若為亂階請從我家始南史陸子真傳王僧達為吳郡太守入閭門曰彼有人焉陸子真五世內侍我之流亞子真即陸機從弟玩之曾孫也諸陸子孫仍居郡城者歷歷可據如此唐時華亭縣已分置陸氏尚多吳人則不可因華亭鶴唳一言移作松江人物明矣

何敞吳郡人好道隱居永元中吳大旱民物顛頓太守慶弘遣

戶曹掾致謁奉印綬煩守無錫敞不受退歎曰郡界有災安得懷道因跋涉之縣駐明星屋中蜂蝗消死敞卽遁去後舉方正博士皆不就卒於家

搜神記

陸著字文伯漢桓靈之間州府交辟不就惟娛棲遁臨卒戒諸子弟云吾少未嘗官於世四十餘年以汝等必矜義勿苟仕

濁世子孫奉遵遺訓遂二代不仕皆有盛名

王僧虔吳地記

陸康字季寧少仕郡以義烈稱刺史臧旻舉茂才除高成令縣在邊垂舊制令戶一人具弓弩以備不虞不得行來長吏新到輒發民繕修城郭康至皆罷遣百姓大悅以恩信爲治寇盜亦息州郡表上其狀遷武陵太守轉桂陽樂安二郡所在

稱之時靈帝欲鑄銅人而國用不足乃詔民田畝斂十錢而比水旱傷稼百姓貧苦康上疏諫內倖譖康檻車徵詣廷尉免歸復徵拜議郎會廬江賊黃穰等與江夏蠻連結十餘萬人攻沒郡縣拜康廬江太守康申明賞罰擊破穰等餘黨悉降帝嘉其功拜康孫爲郎中獻帝卽位天下大亂康蒙險遣孝廉計吏奉貢朝廷詔書策勞加忠義將軍秩中二千石時袁術屯壽春部曲飢餓遣使求委輸兵甲康以其叛逆閉門不通內修戰備將以禦之術大怒遣其將孫策攻康圍城數重康固守吏士有先受休假者皆遁伏還赴暮夜緣城而入受敵二年城陷月餘發病卒朝廷愍其守節拜子儁爲郎中

後漢書

高岱字孔文吳郡人受性聰達輕財貴義太守盛憲以爲上計舉孝廉許貢來領郡岱將憲避難於許昭家求救於陶謙謙未卽救岱憔悴泣血水漿不入口謙感其忠壯有申包胥之義許爲出軍以書與貢岱得謙書還而貢已囚其母吳人皆爲危悚岱言在君則爲君且母在牢獄期於當往遂通書自白貢卽與相見才辭敏捷好自陳謝貢登時出其母岱將見貢語友人張允沈瞿令豫具船以貢必悔當追逐之出便將母乘船易道而逃貢須臾遣人追殺之使與岱錯道遂免被誅時年三十餘隱於餘姚孫策命會稽丞陸昭逆之策虛已

候焉聞其善左傳乃自玩讀之或謂之曰高岱以將軍但英武而已無文學之才若與論傳而云不知者則某言符矣又謂岱曰孫將軍爲人惡勝已者若每問當言不知乃合意耳及與論傳或對不知策果怒以爲輕已囚之知交及時人皆露坐爲請策登樓望見數里中填滿惡其收衆心遂殺之吳錄沈友字子正吳郡人年十一華歆行風俗見而異之因呼曰沈郎可登車語乎友逡巡曰君子講好以禮今仁義陵遲聖道漸壞先生銜命將以裨補先王之教整齊風俗而輕脫威儀猶負薪救火更益其熾乎歆慚曰自桓靈以來雖多英彥未有幼童若此者弱冠博學善屬文兼好武事注孫子兵法又

辨於口咸言其筆舌刀三者皆過絕於人孫權以禮聘既至
 論王伯之畧當時之務權歛容敬焉正色立朝清議峻厲為
 庸臣所譖誣以謀反權亦以終不為已用害之時年二十九
 吳錄

陸績字公紀康少子六歲於九江見袁術術出橘績懷三枚去
 拜辭墮地術曰陸郎作賓客而懷橘乎績跪荅曰欲歸遺母
 術大奇之孫策在吳張昭張紘秦松為上賓共論四海未泰
 須當用武治而平之績年少末座遙大聲言曰昔管夷吾相
 齊桓公九合諸侯一匡天下不用兵車孔子曰遠人不服則
 修文德以來之今論者不務道德懷取之術而維尚武績雖

童蒙竊所未安也昭等異焉績容貌雄壯博學多識星歷算
 數無不該覽虞翻舊齒名盛龐統荊州令士年亦差長皆與
 績友善孫權統事辟為奏曹掾以直道見憚出為鬱林太守
 加偏將軍績既有蹇疾又意在儒雅非其志也雖有軍事著
 述不廢作渾天圖注易釋元皆傳於世豫自知亡日乃為辭
 曰有漢志士吳郡陸績幼敦詩書長玩禮易受命南征邁疾
 遇厄遭命不幸嗚呼悲隔年三十二卒長子宏會稽南部都

尉次子獻長水校尉吳志

始蘇志後漢人物有顧綜字文緯明帝時歷尚書令帝幸
 辟雍延為三老吳丞相雍其後也見吳郡圖經績記所引
 顧况碑文然後漢書及吳志顧雍傳注皆不載事屬傳聞
 今移注墳墓內又吳郡志橋梁類百口橋載東漢顧訓之

五世同居事新通志遂列東漢人物廬志則云訓之仕劉宋為太原太守時代互異宋時亦無太原郡今但注橋梁內

三國吳

顧雍字元歎吳人

吳錄曰雍曾祖父奉字季鴻潁川太守按後漢書張霸傳曰永元中為會稽太守表用

郡人處士顧奉公孫松等奉後為潁川太守松為司隸校尉並有名稱

蔡伯喈嘗避怨於吳雍

從學琴書

江表傳曰雍從伯喈學專一清靜敏而易教伯喈貴異之謂曰卿必成致今以吾名與卿故雍與伯

喈同名也吳錄曰雍字元歎言為伯喈之所歎因以為字焉

州郡表薦為合肥長轉婁曲

阿上虞皆有治蹟孫權領會稽太守不之郡以雍為丞行太

守事討除寇賊郡界寧靜入為左司馬權為吳王累遷大理

奉常領尚書令封陽遂鄉侯拜侯還寺而家人不知迎母於

吳既至權臨賀之親拜其母於庭雍為人不敢酒寡言語舉

動時當權嘗歎曰顧君不言言必有中至飲宴歡樂之際左

右恐有酒失雍必見之是以不敢肆情權亦曰顧公在坐使

人不樂其見憚如此改太常進封醴陵侯代孫邵為丞相平

尚書事其所選用文武將吏各隨能所任心無適莫時訪逮

民間及政職所宜輒密以聞若見納用則歸之於上不用終

不宜洩權以此重之然於公朝有所陳及辭色雖順而所執

者正為相十九年年七十六赤烏六年卒權素服臨弔諡曰

肅侯子濟嗣無後絕永安元年詔以雍次子裕襲爵為醴陵

侯以明著舊勳

吳志 吳錄曰裕一名穆終宜都太守

顧徽字子歎雍母弟少游學有才辯孫權召署主簿嘗出見營軍將一男子至市行刑問何罪云盜百錢徽語使住馳詣闕陳啓方今畜士以圖北虜視此兵壯健且所盜少愚乞哀原權許而嘉之轉東曹掾或傳曹公欲東權謂徽曰卿孤腹心今傳孟德懷異意莫足使揣之卿為吾行拜輔義都尉到北與曹公相見公問境內消息徽應對婉順因說江東大豐山藪宿惡皆慕化為善義出作兵操笑曰孤與孫將軍結婚姻共輔漢室義如一家君何為道此徽曰正以明公與主將義固磐石休戚共之必欲知江東消息是以及耳公厚待遣還權問定云何徽曰敵國隱情卒難探察然徽潛采聽方與袁

譚交爭未有他意乃拜徽巴東太守欲大用之會卒子容字

季則少知名位至鎮東將軍

吳書

顧邵字孝則雍長子博覽書傳好樂人倫少與舅陸績齊名而陸遜張敦卜靜等皆亞焉權妻以策女起家為豫章太守下車祀先賢徐孺子墓優待其後禁其淫祀小吏資質佳者輒令就學擇其先進擢置右職舉善以教風化大行初錢唐丁諝出於役伍陽羨張秉生於民庶烏程吾粲雲陽殷禮起乎微賤邵皆拔而友之為立聲譽諝至典軍中郎秉雲陽太守禮零陵太守粲太子少傅世以邵為知人在郡五年卒官

吳志

陸遜字伯言吳人本名議世江東大族

陸氏世頌曰遜祖紆字叔盤敏淑有思學守城

門校尉父駿字季才淳懿信厚為邦族所懷官至九江都尉遜少孤隨從祖康在官袁術

將攻康康遣遜還吳遜年長於康子績數歲為之綱紀門戶
孫權為將軍遜始仕幕府歷東西曹令史出為海昌屯田都
尉并領縣事開倉振貧勸督農桑時吳會稽丹陽多有伏匿
遜召兵討治所向皆伏拜定威校尉權以兄策女配遜數訪
世務以為帳下右部督會丹陽賊帥費棧受曹操印綬扇動
山越為作內應權遣遜討棧應時破散還屯蕪湖呂蒙稱疾
請建業遜謂曰關羽但務北進未嫌於我今出其不意自可
禽制蒙至權問誰可代者對曰陸遜意思深長才堪負重權
乃召遜拜偏將軍右部督代蒙權乃潛軍而上使遜與呂蒙

為前部至即克公安南郡遜徑進領宜都大守拜撫邊將軍
封華亭侯諸城長吏蠻夷君長皆降又攻房陵南鄉大破之
前後斬獲招納凡數萬計權以遜為右護軍鎮西將軍進封
婁侯黃武元年劉備率大眾來向西界權命遜為大都督假
節督朱然等五萬人拒之備從巫峽建平連圍至夷陵界立
數十屯遜以火攻拔之破其四十餘營備夜遁其舟船器械
水步軍資一時略盡加遜輔國將軍領荊州牧改封江陵侯
七年權使鄱陽太守周魴譎魏大司馬曹休休果舉眾入皖
召遜假黃鉞為大都督衝休伏兵走之追亡逐北徑至夾石
斬獲萬餘牛馬車乘萬輛資械畧盡休還死黃龍元年拜上

大將軍右都護是歲權巡建業留太子等徵遜輔之并掌荊州豫章三郡事董督軍國赤烏七年代顧雍爲丞相領武昌事如故及太子有不安之議遜上疏陳太子正統宜有磐石之固魯王藩臣當使寵秩有差彼此得所上下獲安書三四上及求詣都口論適庶之分既不聽許而遜外甥顧譚顧承姚信並以親附太子枉見流徙太子太傅吾粲坐與遜交書下獄死權累遣中使讓遜憤恚致卒年六十三孫休時追諡昭侯

吳志

陸瑁字子章遜弟少好學篤義陳融濮陽逸蔣纂袁迪等皆單貧有志就瑁游處瑁割少分甘與同豐約同郡徐原素不相

識臨死遺書託以孤弱瑁爲起墳收導其子從父績早亡遺二男一女皆數歲瑁迎攝養至長乃別州郡辟舉皆不就時尚書暨豔盛明臧否頗揚人闇昧之失瑁與書曰今王業始建此乃漢高棄瑕錄用之時若令善惡異流誠可厲俗明教然恐未易行也豔不能行卒以致敗嘉禾元年徵拜議郎選曹尚書孫權欲親征公孫淵瑁再疏諫權嘉其詞理端切遂不行赤烏二年卒

吳志

張敦字叔方卜靜字元風竝吳郡人少與顧邵陸遜等齊名敦德量淵懿清虛淡泊又善文辭孫權爲車騎將軍辟西曹掾轉主簿出補海昏令甚有惠化年三十一卒卜靜終於剡令

吳錄

張溫字惠恕吳人父允以輕財重士名顯州郡爲孫權東曹掾卒溫少修節操容貌奇偉權聞之以問公卿曰溫當今與誰爲比劉基曰可與全琮爲輩顧雍曰溫當今無輩徵到延見文辭古對觀者傾竦權改容加禮拜議郎選曹尚書徙太子太傅甚見重信時年三十二以輔義中郎將使蜀溫至蜀拜章曰昔高宗以諒闇昌殷祚於再興成王以幼冲隆周德於太平今陛下以聰明之資等契往古總百揆於良佐參列精之炳耀遐邇望風莫不欣賴吳國勤任膂力澄清江滸願與有道平一字內委心協規有如河水軍事興煩使役乏少是以忍鄙倍之羞使下臣溫通致情好蜀甚貴其才還使入豫

章部伍出兵權銜溫稱美蜀政又嫌其聲名太盛恐終不爲已用思有以中傷之會暨豔事起遂因此發舉豔字子休亦吳郡人也溫引致之以爲選曹郎至尚書豔性峭厲好爲清議見時郎署混濁淆雜多非其人欲臧否區別賢愚異貫彈射百僚覈選三署率皆貶高就下降損數等其志節卑者皆以爲軍吏置營府以處之由是怨憤聲積浸潤譖行競言豔及選曹郎徐彪專用私情愛憎不由公理豔彪皆坐自殺溫旣宿與豔彪同意數交書疏卽罪溫幽之有司斥還本郡以給廝吏後六年病卒二弟祇白亦有才名與溫俱廢

會稽典錄餘姚

虞俊歎曰張惠恕才多智少華而不實怨之所聚有覆家之禍吾見其兆矣諸葛亮聞俊憂温之意未之信及温放黜亮乃歎其有先見亮初聞温敗未知其故思之數日曰吾得之矣其人於清濁大明善惡太分

吳志

朱桓字休穆吳人孫權爲將軍桓給事幕府除餘姚長往遇疫癘穀食荒貴桓分部良吏隱親醫藥殮粥相繼士民感戴之遷盪寇校尉使部伍吳會二郡鳩合遺散丹陽鄱陽山賊起桓督領諸將周旋赴討皆平定稍遷裨將軍封新城亭侯後代周泰爲濡須督黃武元年魏使曹仁將步騎數萬向濡須仁欲襲取州上先揚聲欲東攻羨谿桓分兵羨谿旣發卒得仁進軍距濡須七十里閒桓乃追還羨谿兵兵未到而仁奄至時桓所部兵在者五千人諸將各有懼心桓因偃旗鼓外示虛弱以誘致仁仁果遣其子泰攻濡須城分遣將軍常雕諸葛虔王雙等乘油船別襲中洲中洲者部曲妻子所在也仁自將萬人留橐臯復爲泰等後拒桓部兵將攻取油船或別擊雕等桓等身自拒泰燒營而退遂梟雕生虜雙送武昌臨陣斬溺死者千餘權嘉桓功封嘉興侯遷奮武將軍領彭城相黃龍元年拜前將軍領青州牧假節嘉禾六年魏廬江主簿呂習請大兵自迎欲開門爲應桓與衛將軍全琮俱以師迎旣至事露軍當引還城外有谿水去城一里所諸軍勒兵渡桓自斷後時廬江太守李膺整兵欲須諸軍半渡擊之及見桓節蓋在後卒不敢出其見憚如此時全琮爲督權又

示虛弱以誘致仁仁果遣其子泰攻濡須城分遣將軍常雕諸葛虔王雙等乘油船別襲中洲中洲者部曲妻子所在也仁自將萬人留橐臯復爲泰等後拒桓部兵將攻取油船或別擊雕等桓等身自拒泰燒營而退遂梟雕生虜雙送武昌臨陣斬溺死者千餘權嘉桓功封嘉興侯遷奮武將軍領彭城相黃龍元年拜前將軍領青州牧假節嘉禾六年魏廬江主簿呂習請大兵自迎欲開門爲應桓與衛將軍全琮俱以師迎旣至事露軍當引還城外有谿水去城一里所諸軍勒兵渡桓自斷後時廬江太守李膺整兵欲須諸軍半渡擊之及見桓節蓋在後卒不敢出其見憚如此時全琮爲督權又

令胡綜參與軍事綜以軍出無獲議欲部分諸將有所掩襲
桓素氣高恥見部伍乃往見綜感激發怒與綜校計綜欲自
解因曰上令胡綜爲督綜意以爲宜爾桓愈恚恨使人呼綜
綜至軍門桓出迎之顧謂左右曰我縱手汝等各自去有一
人旁出語綜使還桓出不見綜知左右所爲因斫殺之桓佐
軍進諫刺殺佐軍遂託狂發詣建業治病權惜其功能故不
罪使子異攝領部曲令醫護視數月復遣還中洲桓性護前
恥爲人下每臨敵交戰節度不得自由輒嗔恚憤激然輕財
貴義兼以強識與人一面數十年不忘部曲萬口妻子盡識
之愛養吏士瞻護六親俸祿產業皆與其分及抱疾困舉營

憂戚年六十二赤烏元年卒吏士無不號慕家無餘財權賜

鹽五千斛以周喪事子異嗣

吳志

朱據字子範吳人有姿貌膂力又能論難黃武初徵拜五官郎
中補侍御史權咨嗟將率發憤歎息追思呂蒙張溫以爲據
才兼文武可以繼之由是拜建義校尉領兵屯湖熟黃龍元
年權遷都建業徵據尚公主拜左將軍封雲陽侯謙虛接士
輕財好施赤烏九年遷驃騎將軍遭二宮構爭據擁護太子
言則懇至義形於色守之以死遂左遷新都郡丞未到中書
令孫弘譖據因權寢疾弘爲詔書追賜死時年五十七孫亮
時二子熊損各復領兵爲全公主所譖皆死永安中追錄前

功以熊子宣襲爵雲陽侯尚公主孫皓時宣至驃騎將軍

吳志

顧悌字子通雍族人以孝悌廉正聞於鄉黨除郎中稍遷偏將

軍孫權末年嫡庶不分悌數與朱據共陳禍福言辭切直朝

廷憚之待妻有禮常夜入晨出希見其面嘗疾篤妻出省之

悌命左右扶起冠幘加襲起對趣令妻還其貞潔不瀆如此

悌父向歷四縣今年老致仕悌每得父書常灑掃整衣服更

設几筵舒書其上拜跪讀之每句應諾畢復再拜若父有疾

耗之問至則臨書垂涕聲語哽咽父以壽終悌飲漿不入口

五日以不見父喪常畫壁作棺柩象設神位於下對之哭泣

服未闋而卒悌四子彥禮謙秘秘晉交州刺史

吳書

沈珩字仲山吳郡人少綜經藝尤善春秋內外傳孫權以珩有

智謀能專對乃使至魏文帝引珩自近談語終日珩隨事響

應無所屈服還吳以奉使有稱封永安鄉侯官至少府

吳書

徐原字德淵吳郡人慷慨有才志呂岱薦為侍御史原性忠壯

好直言岱有得失原輒諫諍原死岱哭之甚哀曰德淵岱之

益友今不幸岱復於何聞過

吳志呂岱傳

顧譚字子默邵子弱冠與諸葛恪等為太子四友從中庶子轉

輔正都尉赤烏中代恪為左節度每省簿書未嘗下籌徒屈

指心計盡發疑謬加奉車都尉薛綜為選曹尚書固讓譚曰

譚心精體密貫道達微才照人物德允眾望誠非愚臣所可

越先後遂代綜祖父雍卒數月拜太常代雍平尚書事時魯王霸有盛寵與太子和齊衡譚疏明嫡庶之禮由是霸與譚有隙時衛將軍全綜子寄為霸賓客素傾邪譚所不納寄父子共構譚坐徙交州譚幽憤著新言二十篇年四十二卒於

交阯

吳志

顧承字子直譚弟與舅陸瑁俱以禮徵孫權賜雍書曰貴孫子直令問休休至與相見過於所聞為君嘉之拜騎都尉領羽林兵後為吳郡西部都尉與諸葛恪等共平山越別得精兵八千人還屯軍章阮拜昭義中郎使入為侍中芍陂之役拜奮威將軍出領京下督數年與兄譚張休等俱徙交州卒

吳志

張純字元基敦之子少厲操行學博才秀容止可觀拜郎中補

廣德令治有異績擢太子輔義都尉孫權廢太子和純盡言

極諫權幽之遂棄市

吳書吳錄合纂

朱異字季文以父任為郎後拜騎都尉代桓領兵赤烏四年隨

朱然攻魏樊城建計破其外圍還拜偏將軍魏廬江太守文

欽營住六安多設屯砦置諸道要以招誘亡叛為邊寇害異

乃身率其手下二千人掩破欽七屯斬首數百遷揚武將軍

權與論攻戰辭對稱意權謂異從父據曰本知季文憎定見

之復過所聞建興元年遷鎮南將軍是歲魏遣胡遵諸葛誕

等出東興異督水軍攻浮梁壞之魏軍大破太平二年假節

爲大都督救壽春圍不解還軍爲孫綝所枉害

吳志

陸抗字幼節遜子遜卒時年二十拜建武校尉領遜衆孫權以楊竺所白遜二十事問抗禁絕賓客中使臨詰抗無所顧問事事條荅權意漸解赤烏九年遷立節中郎將與諸葛恪換屯柴桑抗臨去繕完城圍葺其牆屋居廬桑果不得妄敗恪入屯儼然若新而恪柴桑故屯頗有毀壞深以爲慙永安二年拜鎮軍將軍都督西陵孫皓卽位加鎮軍大將軍領益州牧建衡二年拜都督信陵西陵夷道樂鄉公安諸軍事治樂鄉抗聞都下政令多闕乃疏陳時宜十七條時何定弄權鬪官預政又疏言宜隨才授職抑黜羣小鳳凰元年西陵督步

闡叛降晉抗部分諸軍赴西陵敕築嚴圍自赤谿至故市內以圍闡外以禦寇諸將咸欲攻闡抗每不許晉羊祜率師向江陵諸將咸以抗不宜上抗曰江陵城固兵足無所憂患假令敵得江陵必不能守所損者小如使西陵盤結則南山羣夷皆當擾動所慮難可言也吾寧棄江陵而赴西陵况江陵牢固乎晉徐允率水軍詣建平陽肇至西陵抗令江陵都督張咸固守其城公安督孫遵巡南岸禦祐水軍督留慮鎮西將軍朱琬拒允身率三軍憑圍對肇都督俞贊亡詣肇抗曰贊軍中舊吏知吾虛實吾嘗慮夷兵素不簡練若敵攻圍必先此處卽夜易夷民皆以舊將充之明日肇果攻故夷兵處

抗命旋軍擊之矢石雨下肇衆傷死者相屬肇至經月計屈
夜遁抗使輕兵躡之肇大敗祐等皆引軍還抗遂陷西陵城
誅夷闖族及其將吏修治城圍東還樂鄉貌無矜色謙沖如
常故得將士歡心二年春就拜大司馬荊州牧三年夏病上
疏曰西陵國之西門雖云易守亦復易失若有不守則荊州
非吳有也乞特詔簡閱一切料出以補疆場受敵常處若臣
死之後乞以西方爲屬願陛下思覽臣言秋遂卒子晏嗣晏
及弟景元機雲分領抗兵天紀四年晉軍伐吳所至輒克終
如抗慮景字士仁以尚公主拜騎都尉封毗陵侯澡身好學
著書數十篇晏爲王濬別軍所殺景亦遇害

吳志

陸凱字敬風遜族子黃武初爲永興諸暨長所在有治迹拜建
武都尉手不釋書好太元論演其意以筮輒驗赤烏中除儋
耳太守討朱崖有功遷建武校尉討山賊陳毖於零陵克捷
拜巴邱督偏將軍封都鄉侯轉武昌右部督累遷盪魏綏遠
將軍孫休卽位拜征北將軍假節領豫州牧孫皓立遷鎮西
大將軍都督巴邱領荊州牧進封嘉興侯寶鼎元年遷左丞
相皓時徙都武昌揚土百姓沂流供給以爲患苦又政事多
謬黎元窮匱凱上疏諫時殿上列將何定佞巧便辟貴幸任
事凱面責之定大恨思中傷凱不以爲意乃心公家義形於
色表疏皆指事不飾忠懇內發建衡元年疾病皓遣中書令

董朝問所欲言凱陳何定不可任用姚信婁元賀邵張悌郭
 遵薛瑩及族弟喜抗或清白忠勤或姿才卓茂皆社稷之楨
 幹願陛下訪以時務各盡其忠卒年七十二子禕初為黃門
 侍郎出領部曲拜偏將軍凱亡後入為太子中庶子華覈表
 薦禕體質方剛器幹強固在戎果毅臨財有節夏口賊之衝
 要宜選將鎮戍之臣竊思惟莫善於禕初皓常銜凱數犯顏
 逆旨以重臣難繩以法又陸抗時為大將在疆場故以計容
 忍抗卒後竟徙凱家於建安天紀二年召還建業吳志

陸

名同廟諱

字敬宗凱弟始為御史尚書選曹郎太子和聞其名

待以殊禮會和與魯王霸分爭敬宗坐下獄楚毒備至終無

他辭後為衡陽督軍都尉赤烏十一年交阯九真夷賊攻沒
 城邑以敬宗為交州刺史安南校尉喻以恩信務崇招納賊
 黨皆降交域清泰永安元年徵為西陵督封都亭侯後轉左
 虎林華覈表敬宗天姿聰朗才通行潔昔歷選曹遺疏可紀
 還在交州流民歸附商旅平行民無疾疫田稼豐稔惠風橫
 被化感人神遂憑天威招合遺散在州十有餘年賓帶殊俗
 寶玩所生而內無粉黛附珠之妾家無文甲犀象之珍方之
 今臣實難多得宜在輦轂股肱王室卒子式嗣為柴桑督揚
 武將軍天策元年與從兄禕俱徙建安天紀二年召還建業

復將軍侯

吳志

張儼字子節吳人弱冠知名以博學多識拜大鴻臚孫皓寶鼎元年遣使於晉既至車騎將軍賈充尚書令裴秀侍中荀勗等欲傲以所不知而不能僕射羊祜尚書何禎並結縞帶之好及還道病死

吳錄 儼子勃撰吳錄三十卷翰亦儼子見後

陸璣字元恪吳郡人吳太子中庶子烏程令撰毛詩鳥獸草木

蟲魚疏二卷 經典序錄

晉

陸喜字恭仲瑁子仕吳累遷吏部尚書少有聲名好學有才思嘗作言道訪論古今歷審機娛賓九思其書近百篇吳平又作西州清論傳於世借稱諸葛孔明以行其書太康中詔曰

偽尚書陸喜等十五人南士歸稱並以貞潔不容皓朝或忠而獲罪或修身退志敕所在以禮發遣須到隨才授用乃以喜為散騎常侍尋卒

晉書

吾彥字士則吳人出自寒微有文武才幹身長八尺手格猛獸膂力絕羣仕吳為通江吏初為小將給事吳大司馬陸抗抗奇其勇略將拔用之患眾情不允乃會諸將密使人陽狂拔刀跳躍而來坐上諸將皆懼而走惟彥不動舉几禦之眾服其勇乃擢用焉稍遷建平太守時王濬將伐吳造船於蜀彥覺之請增兵為備皓不從彥乃輒為鐵鎖橫斷江路及師臨境緣江諸城皆望風降附或見攻拔唯彥堅守大眾攻之不

能克乃退舍禮之吳亡彥始歸降武帝以爲金城太守轉敦
煌威恩甚著遷鴈門太守時順陽王暢驕縱前後內史皆誣
以罪及彥爲順陽內史清身率下威刑嚴肅衆皆畏懼暢不
能誣乃更薦之冀其去職遷員外散騎常侍會交州刺史陶
璜卒以彥爲南中都督交州刺史初璜之死九真戍兵作亂
逐其太守賊帥趙祉圍郡城彥討平之在鎮二十餘年威恩
大著南州寧靜自表求代徵爲大長秋卒於官

晉書

陸機字士衡抗子身長七尺其聲如鐘少有異才文章冠世抗
卒領父兵爲牙門將年二十而吳滅退居舊里閉門勤學積
十年太康末與弟雲俱入洛造張華華素重其名如舊相識

曰伐吳之役利獲二雉薦之諸公楊駿辟爲祭酒駿誅累遷
太子洗馬著作郎吳王晏出鎮淮南以機爲郎中令遷尚書
中兵郎轉殿中郎趙王倫輔政引爲相國參軍豫誅賈謐功
賜爵關中侯倫將篡位以爲中書郎倫誅齊王回收機付廷
尉成都王穎吳王晏並救理之滅死徙邊遇赦而止時中國
多難顧榮戴若思等咸勸機還吳機負其才望而志匡世難
故不從時成都王穎勞謙下士機旣感全濟之恩又謂穎必
能康隆晉室遂委身焉穎以機參大將軍軍事表爲平原內
史太安初穎與河閒王顥起兵討長沙王又假機後將軍河
北大都督督北中郎將王粹冠軍將軍牽秀等諸軍二十餘

萬人機以三世爲將道家所忌又羈旅入宦頓居羣士之右固辭都督穎不許遂行機始臨戎而牙旗折意甚惡之列軍自朝歌至於河橋鼓聲聞數百里漢魏以來出師之盛未嘗有也長沙王又奉天子與機戰於鹿苑機軍大敗初宦人孟玖弟超並爲穎所嬖寵超領萬人爲小都督未戰縱兵大略機錄其主者超將鐵騎直入機麾下奪之顧謂機曰貉奴能作督否機司馬孫拯勸機殺之機不能用超宣言於衆曰陸機將反又還書與玖言機持兩端軍不速決及戰超不受機節度輕兵獨進而沒玖疑機殺之遂譖機於穎言其有異志將軍王闡郝昌公師藩等皆玖所用與牽秀等共證之穎大

怒使秀密收機機釋戎服著白紵與秀相見神色自若謂秀曰自吳朝傾覆吾兄弟宗族蒙國重恩成都命吾以重任辭不獲已今日受誅豈非命也因與穎牋詞甚悽惋旣而歎曰華亭鶴唳豈可復聞乎遂遇害時年四十三士卒莫不流涕是日昏霧晝合大風折木平地尺雪議者以爲陸氏之冤機天才秀逸藻詞宏麗張華嘗謂之曰人之爲文常恨才少而子更患其多弟雲爲書曰君苗見君文輒欲燒其筆硯後葛洪稱其文猶元圃積玉無非夜光五河吐流泉源如一其宏麗妍瞻英銳標逸亦一代之絕乎其爲人所推如此然好游權門與賈謐親善以進趣獲譏所著文章二百餘篇並行於

世書晉

陸雲字士龍六歲能屬文清正有才理少與兄機齊名雖文章不及而持論過之號曰二陸年十六舉賢良吳平入洛爲太子舍人出補浚儀令縣居都會之要名爲難理雲到官肅然下不能欺市無二價一縣稱其神明郡守害其能屢遣責之雲乃去官百姓追思之畫像配食縣社尋拜吳王晏郎中令成都王穎表爲清河內史穎將討齊王回以雲爲前鋒都督回誅轉大將軍右司馬穎晚節政衰雲屢以正言迂旨孟玖欲用其父爲邯鄲令雲固執不許玖深忿怨機敗并收雲穎官屬江統蔡克棗嵩等上疏救雲克至叩頭流血僚屬數十

人流涕固請穎惻然有宥雲色孟玖扶穎入催令殺雲時年四十二有二女無男門生故吏迎葬清河所著文章二百四十九篇新書十篇行世雲弟耽爲平東祭酒亦有清譽與雲同遇害孫惠與朱誕書曰不意三陸相攜闇朝一旦湮滅國喪雋望悲豈一人後東海王越討穎移檄天下亦以機雲兄弟枉害罪狀穎云晉書

顧榮字彥先雍孫宜都太守穆之子仕吳黃門侍郎太子輔義都尉吳平與陸機兄弟同入洛時號三俊拜郎中歷尚書郎廷尉正趙王倫誅淮南王允收允僚屬付廷尉榮平心處當多所全宥及倫篡位子虔爲大將軍以榮爲長史初榮宴飲

見執炙者貌狀不凡有欲炙之色榮割炙陷之坐者問其故榮曰豈有終日執之而不知其味及倫敗榮被執將誅而執炙者爲督率救之得免齊王同召爲大司馬主簿同擅權驕恣榮懼及禍終日昏酣不綜府事轉中書侍郎同誅榮以討葛旃功封嘉興伯轉太子中庶子長沙王又爲驃騎復以榮爲長史又敗轉成都王穎丞相從事中郎惠帝西遷長安徵爲散騎常侍以世亂不應遂還吳東海王越聚兵於徐州以榮爲軍諮祭酒屬廣陵相陳敏反南渡江逐揚州刺史劉機丹陽內史王曠阻兵據州分置子弟爲列郡收禮豪傑有孫氏鼎峙之計假榮右將軍丹陽內史榮數踐危亡之際恒以

恭遜自免敏欲誅諸士人榮說解之敏納其言仍遣甘卓出橫江堅甲利器盡以委之榮私於卓曰敏旣常才政令反覆子弟驕矜其敗必矣而吾等安受其祿事敗之日使江南諸軍函首送洛題曰逆賊顧榮甘卓之首辱及萬世可不圖之卓從之明年周圯與榮及甘卓紀瞻潛謀起兵攻敏榮發橋斂舟於南岸敏率萬餘人出不獲濟榮麾以羽扇其衆潰散事平還吳元帝鎮江東以榮爲軍司加散騎常侍謀畫皆諮焉六年卒官帝臨喪盡哀贈榮侍中驃騎將軍開府儀同三司謚曰元及帝爲晉王追封爲公子毗嗣官至散騎侍郎榮兄子顯泰興中爲散騎侍郎

晉書

張翰字季鷹吳人父儼吳大鴻臚翰有清才善屬文而縱任不拘時人號為江東步兵會稽賀循赴命入洛經吳闔門於船中彈琴翰初不相識乃就循言談大相欽悅問循知其入洛曰吾亦有事北京便同載即去不告家人齊王辟為大司馬東曹掾同時執權翰謂同郡顧榮曰天下紛紛禍難未已夫有四海之名者求退良難吾本山林閒人無望於時子善以明防前以智慮後榮執其手愴然曰吾亦與子採南山蕨飲三江水耳翰因見秋風起乃思吳江菰菜蓴羹鱸膾曰人生貴適志何能羈宦數千里以要名爵乎遂命駕而歸著首邱賦俄而回敗人皆謂之見幾翰任心自適不求當世或謂

之曰卿乃可縱適一時獨不為身後名邪翰曰使我有身後名不如即時一杯酒時人貴其曠達性至孝遭母憂哀毀過禮年五十七卒其文筆數十篇行於世

晉書

蔡洪字叔開吳郡人有才辯初仕吳太康中本州從事舉秀才仕至松滋令嘗作孤奮論與王沈釋時論意同讀之者莫不歎息焉

晉書參世說注 世說注又載洪與刺史周浚書曰 一日侍坐言及吳士敕令條列名狀今稱疏所知朱 誕字永長吳郡人體履清和黃中通理吳朝舉賢良累遷議 郎今歸在家誠理物之至德清選之高望也嚴隱字仲弼吳 郡人稟氣清純思度淵偉吳朝舉賢良宛陵令吳平去職九 臯之鳴鶴空谷之白駒也張陽字威伯吳郡人稟性堅明志 行清朗居磨涅之中無緇磷之損歲寒之松栢幽夜之逸光 也 按晉書賀循傳陳敏之亂豪傑皆見維繫惟循與吳郡 朱誕不豫其事即洪 所稱字永長者也

吳震吳郡人學行清修老而未調華譚薦為著作郎

晉書華譚傳

陸騁字士光吳人少有雅望從兄機每稱之曰我家世不乏公

矣居喪以孝聞後察孝廉除永世烏江令皆不就元帝初鎮

江左辟為祭酒尋補振威將軍義興太守不拜預討華軼功

封平望亭侯累遷散騎常侍本郡大中正太興元年遷太子

詹事時帝以侍中宜兼用南人騁以清貞著稱遂拜侍中徙

尚書領州大中正明帝即位轉光祿勳遷太常代紀瞻為尚

書左僕射領太子少傅尋加金紫光祿大夫代卞壺為領軍

將軍以平錢鳳功進爵江陵伯帝不豫騁與王導卞壺庾亮

溫嶠郗鑒並受顧命輔皇太子更入殿將兵直宿加散騎常

侍成帝踐阼拜左光祿大夫開府儀同三司蘇峻之難隨帝

在石頭舉動方正不以凶威變節峻以騁吳士之望不敢加

害使守留臺匡術以苑城歸順時共推騁督宮城軍事峻平

加衛將軍以勲進爵為公封次子嘏新康子咸和中卒贈侍

中車騎大將軍諡曰穆

晉書

顧衆字長始榮族弟父秘字公真有文武才幹以員外散騎常

侍為交州刺史衆出後伯父早終事伯母以孝聞元帝為鎮

東將軍命為參軍以討華軼功封東鄉侯辟丞相掾及帝踐

阼徵拜駙馬都尉轉尚書郎大將軍王敦請為從事中郎上

補南康太守會詔除鄱陽太守加廣武將軍衆徑之鄱陽不

過敦敦甚怪焉及敦構逆令衆出軍衆遲回不發敦大怒以軍期名衆還詰之聲色甚厲衆不爲動敦意漸釋敦事捷欲以衆爲吳興內史衆固辭敦鎮姑孰復以爲從事中郎敦平除太子中庶子爲義興太守加揚威將軍蘇峻反王師敗績衆還吳潛圖義舉時吳國內史庾冰奔會稽峻以蔡謨代之前陵江將軍張慙爲峻收兵於吳衆遣人喻慙慙從之衆乃遣郎中徐機告謨曰衆已潛合家兵與張慙剋期效節謨乃檄衆爲本國督護揚威將軍吳中人士同時響應大破峻將弘徽收其軍實賊率張健等攻據吳城衆自海虞由婁縣東倉與賊別率戰破之進屯烏苞會稽內史王舒吳興內史虞

潭檄衆爲五郡大督護統諸義軍討健潭遣姚休爲衆前鋒與賊戰沒衆還守紫壁時賊黨方銳咸勸衆過浙江衆不聽版范明爲參軍率諸軍復進討健健退曲阿衆進住吳城遣督護朱祈等九軍與蘭陵太守李閔守處亭健遣馬流陶陽等攻之閔與祈等逆擊大破之峻平論功封鄱陽縣伯拜丹陽尹本國大中正入爲侍中轉尚書咸康末遷鎮軍將軍揚州大中正固讓未拜以母憂去職穆帝卽位復徵爲領軍不起服闋乃就遷尚書僕射永和二年卒贈特進光祿大夫謚曰靖

晉書

陸玩字士瑤瞻弟器量淹雅弱冠有美名元帝引爲丞相參軍

累拜侍中遷吏部尚書轉尚書左僕射領本州大中正蘇峻反遣玩與兄聘俱守宮城玩潛說匡術歸順以功封興平伯轉尚書令又授左光祿大夫開府儀同三司加散騎常侍王導郗鑒庾亮相繼薨以玩有德望乃遷侍中司空玩雖登公輔謙讓不辟掾屬成帝勸之玩不得已從命所辟皆寒素有行之士玩翼亮累世常以弘重為人主所貴加性通雅不以名位格物誘納後進謙若布衣由是縉紳之徒莫不蔭其德

宇卒諡曰康給兵千人守冢七十家

晉書

陸納字祖言玩弟少有清操貞厲絕俗初辟鎮軍大將軍武陵王掾州舉秀才太原王述雅敬重之引為建威長史累遷黃

門侍郎本州別駕尚書吏部郎出為吳興太守至郡不受俸祿徵拜左民尚書領州大中正臨發止有被襪而已餘並還官遷太常徙吏部尚書加奉車都尉衛將軍謝安常欲詣納而納殊無供辦兄子俶不敢問之乃密為之具安既至納所設唯茶果俶遂陳盛饌客罷納大怒曰汝不能光益父叔乃復穢我素業杖之四十兄子禽犯法應刑乞免官謝罪詔特許輕降遷尚書左僕射加散騎常侍拜尚書令恪勤貞固始終不渝會稽王道子以少年專政委任羣小納望闕歎曰好家居織兒欲撞壞之邪朝士咸服其忠亮除左光祿大夫開府儀同三司未拜卒即以為贈

晉書

陸邁字功高吳郡人器識清敏風檢澄峻累遷振威太守尚書吏部郎蘇峻東征沈充請邁與俱將至吳密敕左右令入閭門放火以示威邁知其意謂曰吳治平未久必將有亂若爲亂階請從我家始峻遂止

世說

顧和字君孝侍中衆之族子總角便有清操族叔榮曰此吾家麒麟也王導爲揚州辟從事謂和曰卿珪璋特達不徒東南之美實爲海內之俊由是知名累遷司徒掾東海王冲爲長水校尉以和爲主簿永昌初除司徒左曹掾太寧初王敦請爲主簿遷太子舍人車騎參軍護軍長史王導爲揚州請爲別駕所歷皆著稱遷散騎侍郎尚書吏部司空郗鑒請爲長

史領晉陵太守咸康初拜御史中丞劾奏尚書左丞戴抗賊汙付法議罪并免尚書傅玩劉傭官百僚憚之遷侍中初中興東遷舊章多闕冕旒飾以翡翠珊瑚雜珠和奏舊冕有十二旒皆玉珠今用襍珠等非禮成帝始下太常改之帝以保母周氏有阿保之勞欲假其名號內外皆奉詔和獨以爲非法帝從之轉吏部尚書徙太常卿國子祭酒康帝卽位將祀南北郊和議以爲車駕宜親行帝從之皆躬親行禮遷尚書僕射以母老固辭更拜銀青光祿大夫領國子祭酒母憂去職居喪以孝聞旣練衛將軍褚裒薦起爲尚書令遣散騎郎喻旨和每見催逼輒號咷慟絕帝又下詔強之和表疏十餘

上遂不起服闋然後視職居任多所獻納雖權臣不苟阿撓
永和七年以疾篤辭位拜左光祿大夫儀同三司加散騎常
侍尚書令如故卒贈侍中司空諡曰穆晉書 又顧覲之家
傳和孫敷字祖根伯
然有大成之量仕至
著作郎二十三卒

張憑字長宗吳郡人祖鎮蒼梧太守憑年數歲鎮謂其父曰我
不如汝有佳兒憑曰阿翁豈宜以子戲父邪及長有志氣為
鄉閭所稱舉孝廉負其才自謂必參時彥初欲詣丹陽尹劉
惔鄉里及同舉者共笑之既至惔處之下坐神意不接憑欲
自發而無端會王濛就惔清言有所不通憑於末坐判之言
旨深遠一坐皆驚惔延之上坐清言彌日留宿至旦遣之憑

既還船須臾惔遣傳教覓張孝廉船便召與同載遂言之於
簡文帝帝召與語歎曰張憑勃率為理窟官至吏部郎御史


中丞晉書

張元之字祖希世說云顧
和外孫吳人吳郡太守澄之孫澄父嘉及子
彭祖俱善書

見藝
術傳少以學顯歷吏部尚書出為冠軍將軍吳興太守會稽

內史謝元同時之郡論者以為南北之望元之名亞謝元時
亦稱南北二元卒於郡續晉
陽秋

張禕吳郡人少有操行恭帝為琅邪王以禕為郎中令及帝踐
阼劉裕以禕帝之故吏素所親信封藥酒一罌付禕密令鳩
帝禕既受命歎曰鳩君而求生何面目視息世閒哉不如死



也因自飲之而死晉書

蘇州府志卷第四十七

蘇州府志卷第四十八

人物二吳縣

宋

張裕字茂度吳人名與宋武帝諱同故以字稱曾祖澄晉光祿大夫祖彭祖廣州刺史父敞侍御史度支尚書吳國內史茂度為宋武帝太尉主簿揚州中從事累遷別駕武帝西伐劉毅北伐關洛皆居守留任州事出為都督廣州刺史平越中郎將綏靖百越嶺外安之元嘉元年為侍中都督益州刺史累遷太常以脚疾出為義興太守徵為都官尚書以疾就拜光祿大夫加金章紫綬茂度內足於財自絕人事經始本縣

之華山以爲居止優遊野澤者七年十八年除會稽太守素有吏能職事甚理卒於官諡恭子子演鏡永辨岱俱知名時謂之張氏五龍南史

張邵字茂宗裕弟初爲晉琅邪內史王誕龍驤府功曹桓元徙誕於廣州親故皆離棄之唯邵情禮彌謹流涕追送又資饋其妻子桓元篡位父敞先爲尙書以荅事微謬降廷尉卿及宋武帝討桓元邵白敞獻忠欵帝大悅命署寺門曰有犯張廷尉家者軍法論事平以敞爲吳興太守及王謐爲揚州召邵補主簿轉太尉參軍帝以邵勤練憂公重補州主簿邵悉心政事精力絕人及誅劉藩邵時在西州直廬卽夜誠衆曹

曰大軍當大討可各各條倉庫及舟船人領至曉取辦旦日帝求諸簿最應時卽至怪問其速諸曹荅曰宿受張主簿處分帝曰張邵可謂同人憂慮矣九年世子始開征虜府以邵補錄事參軍轉號中軍遷諮議參軍領記室十二年武帝北伐邵請見曰人生危脆宜有遠慮若劉穆之邂逅不幸誰可代之尊業如此若有不諱則處分云何帝曰此乃委穆之與卿耳檀祗鎮廣陵輒率衆至滁中掩討亡命劉穆之慮其爲變議欲遣軍邵曰檀韶據中流道濟爲軍首若有相疑之迹則大府立危不如逆遣慰勞必無患也祗果不動及穆之暴卒朝廷懼便發詔以司馬徐羨之代邵獨曰今誠急病任

終在徐然世子無專行之義宜須諮信反方使世子出命武帝善其臨事不撓得大臣節十四年世子改授荊州邵諫曰儲貳之重四海所繫不宜外出世子竟不行文帝爲荊州刺史以邵爲司馬領南郡相衆事悉決於邵武帝受命以佐命功封臨沮伯湘州刺史荊州刺史謝晦反遺書要邵邵不發函使呈文帝元嘉五年轉雍州刺史至襄陽築長圍修立隄堰創田數千頃公私充給後爲吳興太守卒諡曰簡南史

陳遺吳郡人少爲郡吏母好食鍋底飯遺在役恒帶一囊每煮食輒錄其焦以貽母後孫恩亂聚得數斗恒帶自隨及敗逃竄多有餓死遺以此得活母晝夜泣涕目爲失明耳無所聞

遺還入戶再拜號咽母豁然卽明

南史

陸徽字休猷吳郡人補建康令清平無私爲文帝所善元嘉十五年除平越中郎將廣州刺史加督清名亞王鎮之爲士庶所愛詠二十三年爲益州刺史亦加督郵隱有方威惠兼著寇盜靜息人物殷阜蜀中安之卒於官身亡之日家無餘財文帝甚痛惜之諡曰節子南史

陸子真晉太尉玩之曾孫自玩至子真父萬載世爲侍中皆有名行子真兄仲元又爲侍中時人方之金張二族子真仕宋爲海陵太守時中書舍人秋當見幸家在海陵假還葬父子真不與相聞當請發民修橋又以妨農不許彭城王義康聞

而賞之王僧達貴公子孫以才傲物爲吳郡太守入閭門曰
彼有人焉顧琛一公兩掾英英門戶陸子真五世內侍我之
流亞子真自臨海太守眼疾歸爲中散大夫卒

南史

顧琛字弘瑋和曾孫祖履之父恢並爲司徒左西曹掾琛謹確
不尚浮華起家州從事駙馬都尉累遷尚書庫部郎元嘉七
年到彥之經畧河南大敗悉委棄兵甲武庫爲之空虛後文
帝宴會有歸化人在坐上問琛庫中仗猶有幾許琛詭荅有
十萬人仗舊武庫仗秘不言多少上旣發問追悔失言及琛
詭對上甚善之坐譴出免中正仍爲彭城王義康所請補司
徒錄事參軍十五年出爲義興太守初義康請琛入府欲委

以腹心琛不能承事劉湛故尋見出外十九年徙東陽太守
欲使防守義康固辭忤旨廢黜還家積年元凶弑立分會稽
五郡置會州以琛爲會稽太守遷吳興孝建元年爲吳郡太
守以起義功封永新縣五等侯大明元年免官停家琛初事
司空竟陵王誕誕反遣客陸延稔齎書版琛及子弟官孝武
以琛素結事誕或有異志遣信就吳郡太守王曇生誅琛父
子會延稔先至琛等卽執斬之遣二子送延稔首啓聞孝武
所遣誅琛使其日亦至僅而獲免仍爲吳興太守歷都官尚
書廢帝卽位爲吳郡太守泰始初與四方同反兵敗奉母奔
會稽臺軍旣至歸降後爲員外常侍中散大夫卒

南史

顧覲之字偉仁吳人爲謝晦參軍晦愛其雅素深相知待歷位
尚書都官郎殷劉隙著覲之不欲與殷景仁久接乃辭脚疾
免歸每夜常於床上行脚家人竊異之而莫曉其意及義康
徙廢朝廷多受禍覲之竟免後爲山陰令山陰劇邑前後官
長晝夜不得休事猶不舉覲之御繁以約縣用無事後爲尚
書吏部郎孝建中爲湘州刺史以政績稱大明元年徵守度
支尚書轉吏部尚書後爲吳郡太守幸臣戴法興權傾人主
覲之未嘗低意左光祿大夫蔡興宗與覲之善嫌其風節過
峻覲之曰辛毘有云孫劉不過使吾不爲三公耳後卒於湘
州刺史謚簡子南史

張鏡裕次子少與顏延之鄰居顏談議飲酒喧呼不絕而鏡靜
默無言聲後鏡與客談延之從籬邊聞之取胡牀坐聽辭義
清元延之心服謂客曰彼有人焉由是不復酣叫仕至新安

太守南史

張永字景雲裕子累遷尚書中兵郎建康令廣陵王誕錄事參
軍永涉獵書史能爲文章善隸書騎射雜藝觸類兼善又有
巧思爲文帝所知紙墨皆自營製芝華林園元武湖並使永
監統永既有才能每盡心力文帝謂堪爲將二十九年以永
爲揚威將軍冀州刺史加都督王元謨申坦等諸將經略河
南進攻碯碯累旬不拔爲魏軍所殺甚衆永卽夜撤圍退軍

不報告諸將衆軍驚擾爲魏所乘死敗塗地永及申坦並爲
統府撫軍將軍蕭思話所收繫獄詔責永等與思話三十年
元凶弒立起永爲青州刺史及司空南譙王義宣起義又版
永爲冀州刺史加都督永遣司馬崔勲之中兵參軍劉宣則
二軍馳赴國難事平召爲江夏王義恭大司馬從事中郎領
中兵孝建元年臧質反遣永輔武昌王渾鎮京口大明三年
累遷廷尉永曉音律太極殿鐘聲嘶孝武問永永荅鐘有銅
滓乃扣鐘求其處鑿而去之聲遂清越明帝卽位爲青冀二
州刺史監四州諸軍事統諸將討徐州刺史薛安都累戰尅
捷破薛索兒又遷鎮軍將軍尋爲南兖州刺史加都督時安

都據彭城請降而誠心不效明帝遣永與沈攸之重兵迎之
進軍彭城安都招引魏軍既至永狼狽引軍還爲魏軍追大
敗三年徙會稽太守以破薛索兒功封孝昌縣侯廢帝卽位
進右光祿大夫侍中領安城王師出爲吳郡太守元徽二年
爲征北將軍南兖州刺史加都督未之鎮遇桂陽王休範作
亂永率所領屯白下遣人覘賊既反唱言臺城陷永衆潰棄
軍還免官削爵以愧發病卒

南史

張暢字少微邵兄禕子起家爲太守徐佩之主簿佩之被誅暢
奔赴制服盡哀爲論者所美弟牧嘗爲獬犬所傷醫云宜食
蝦蟆牧甚難之暢含笑先嘗牧乃食創卽愈累遷太子中庶

子孝武鎮彭城暢爲安北長史元嘉二十七年魏太武南征
太尉江夏王義恭統諸軍出鎮彭城太武親率大衆去彭城
數十里彭城衆力雖多軍食不足義恭欲棄彭城南歸時歷
城衆少食多參軍沈慶之議欲奉二王及妃媛直趨歷城分
兵配護軍蕭思話留守長史何勗欲席卷奔鬱洲自海道還
都二議未決更集羣僚謀之暢曰若歷城鬱洲有可至之理
下官敢不高讚今城內乏食百姓咸有走情但以關扃嚴固
欲去莫從耳若一旦動脚則各自散走欲至所在何由可得
今軍食雖寡朝夕猶未窘罄豈有捨萬安之術走危亡之道
若此計必用下官請以頸血汚君馬跡孝武聞暢議謂義恭

曰張長史言不可異也義恭乃止魏太武至登城南亞父冢
於戲馬臺立瓊屋先是隊主蒯應見執其日晡時太武遣應
至小市門致意求甘蔗及酒孝武遣人送酒二器甘蔗百挺
求駱駝明日太武又自上戲馬臺復遣使至小市門求與孝
武相見遣送駱駝并致雜物使於南門受之暢於城上與魏
尚書李孝伯語孝伯辭辯亦北土之美暢隨宜應荅吐屬如
流音韻詳雅風儀華潤孝伯及左右並相視歎息時魏聲云
當出襄陽故以暢爲南譙王義宣司空長史南郡太守三十
年元凶弒逆義宣發哀之日卽便舉兵暢爲元佐位居僚首
哀容俯仰蔭映當時舉哀畢改服著黃袴褶出射堂簡人音

姿容止莫不屬目事平徵為吏部尚書封夷道縣侯義宣既
 有異圖以暢人望留之解南蠻校尉以授暢加冠軍將軍領
 丞相長史暢遣門生荀僧寶下都宋書荀因顏竣陳義宣釁
 狀僧寶不時下會義宣起兵津路斷絕遂不得去義宣將為
 逆遣嬖人翟靈寶告暢暢陳必無此理請以死保之靈寶知
 暢不回勸義宣殺以徇眾賴丞相司馬竺超民得免進號撫
 軍別立軍部以收人望暢隨義宣東下梁山戰敗為軍人所
 掠下廷尉尋見原起為都官尚書轉侍中出為會稽太守卒

諡曰宣子南史

張敷邵子生而母亡年數歲問知之雖童蒙便有感慕之色至

十歲許求母遺物而散施已盡惟得一扇乃緘錄之每至感
 思卽開筭流涕見從母悲感哽咽性整貴風韻甚高好讀元
 言兼屬文論初父邵使與高士南陽宗少文談繫象少文每
 屈握麈尾歎曰吾道東矣宋武帝召見竒之曰真千里駒也
 以為世子中軍參軍敷見接引累遷江夏王義恭撫軍記室
 參軍遷正員中書郎敷小名檀父邵小名梨文帝戲之曰檀
 何如梨荅曰梨是百果之宗檀何敢比元嘉中遷黃門侍郎
 始興王濬後軍長史司徒左長史未拜父在吳興亡報以疾
 篤敷往奔省自發都至吳興成服凡十餘日始進水漿葬畢
 不進鹽菜遂毀瘠成疾伯父茂度每止譬之輒更感慟絕而

復續茂度曰吾冀譬汝有益但更甚耳自是不復往未期而卒孝武卽位追贈侍中改其所居稱孝張里

南史參宋書

陸法真吳郡人世祖時歷官有清節嘗爲劉秀之安北錄事參軍太山羊希與安北諮議參軍孫詵書曰足下同僚有志節年高事者此生東南名地又張元外孫持身至清雅有志節年高官下秉操不衰當日夕相與申意太宗初爲南海太守卒於

官

宋書良吏傳

齊

張岱字景山裕第五子州辟從事累遷司徒左西曹掾母年八十籍注未滿岱便去官還養有司將糾舉宋孝武曰觀過知

仁不須按也遷山陰令職事閑理巴陵王休若爲北徐州臨海王爲廣州豫章王爲揚州晉安王爲南兗州岱歷爲三府諮議三王行事與典籤主帥共事事舉而情得或謂岱曰主王旣幼執事多門而每能緝和公私云何致此岱曰我爲政端平待物以禮悔吝之事無由而入爲黃門郎新安王子鸞以盛寵爲南徐州割吳郡屬焉高選佐史孝武召岱謂曰卿美效夙著兼資宦已多今用卿爲子鸞別駕總刺史之任無謂小屈終當大申也帝崩累遷吏部郎泰始末爲吳興太守元徽中爲益州刺史數年益土安其政累遷吏部尙書加散騎常侍建元元年出爲吳郡太守高帝知岱歷任清直至

郡未幾手敕曰大郡任重乃未欲回換但總戎務殷宜須望實今用卿為護軍加給事中岱拜竟詔以家為府武帝即位復為吳興太守更以寬恕著名卒諡曰貞子南史

全景文字弘達吳郡人少有氣力與沈攸之同載出都到奔牛

埭有人相之曰君等皆方伯人行當富貴也景文仍得將領

為軍主

按南史沈攸之傳云初攸之賤時與吳郡朱超之全景文共乘一小船出都二人共上引埭有人相之曰

三人皆當至方伯後超之廣州刺史齊書少朱超之一人盧志參用之孝建初為竟陵王驃騎

行參軍以功封漢水侯泰始二年為假節寧朔將軍冗從僕

射軍主隨劉亮討破東賊於晉陵除長水校尉假輔國將軍

北討薛索兒於破釜嶺水軍斷賊糧運仍隨太祖於葛冢石

梁再戰皆有功南賊相持未決敕景文隸劉亮拒劉胡攻圍

力戰身被十創封孝寧縣侯元徽末出為南豫州刺史建元

元年以不預佐命國除授南琅邪太守遷光祿大夫永明九

年卒南齊書

陸澄字彥淵吳人祖劭臨海太守父瑗州從事澄少好學博覽

無所不知行坐眠食手不釋卷宋泰始初為尚書殿中郎兼

左丞六年詔皇太子朝服袞冕九章澄與議曹郎邱仲起議

服冕以朝實著經文秦除六冕漢明還備魏晉以來不欲令

臣下服袞冕故位公者加侍官今皇太子禮絕羣后宜遵聖

王盛典革近代之制齊永明元年累遷度支尚書尋領國子

博士尚書令王儉謂之曰昔曹志繆悅爲此官以君係之始無慙德澄與儉書陳王弼注易元學之所宗今若弘儒鄭注不可廢并言左氏杜學之長穀梁舊有麋信近益以范甯不足兩立世有一孝經題爲鄭元注觀其用辭不與注書相類案元自序所注衆書亦無孝經且爲小學之類不宜列在帝典儉荅曰易體微遠實貫羣籍豈可專據小王便爲該備依舊存鄭元凱注傳超邁前儒穀梁小書無俟兩注存麋略范率由舊式凡此諸議並同雅論疑孝經非鄭所注僕以此書明百行之首實人論所先七略藝文並陳之六藝不與蒼頡凡將之流也鄭注虛實前代不嫌意謂可安仍舊立置儉自

以博聞多識讀書過澄澄謂曰僕少來無事唯以讀書爲業且年位已高今君少便鞅掌王務雖復一覽便諳然見卷軸未必多僕儉集學士何憲等盛自商略澄待儉語畢然後談所遺漏數百千條皆儉所未覩乃歎服儉在尚書省出巾箱几案雜服飾令學士隸事事多者與之人人各得一兩物澄後來更出諸人所不知事復各數條并舊物奪將去轉散騎常侍祕書監吳郡中正光祿大夫加給事中尋領國子祭酒竟陵王子良得古器小口方腹而底平可容七八升以問澄澄曰此名服匿單于以與蘇武子良詳視器底有字彷彿可識如澄所言隆昌元年以老疾轉光祿大夫加散騎常侍未

拜卒謚靖子所撰地理書及雜傳死後乃出南史

張緒字思曼岱兄演子少知名清簡寡欲孝武帝用爲尙書倉部郎明帝每見緒輒歎其清淡轉太子中庶子本州大中正後爲侍中遷吏部郎參掌大選又遷侍中出爲吳郡太守昇明二年爲齊高帝太傅長史建元元年轉中書令緒善談元深見敬異王儉嘗曰緒過江所未有北士可求之耳不知陳仲弓黃叔度能過之否及立國學以緒爲太常卿領國子祭酒以王延之代緒爲中書令何點歎曰晉以子敬季琰爲此職今以王延之張緒爲之可謂清官後接之者實爲未易緒長於周易言精理與見宗一時嘗云何平叔不解易中七事

武帝卽位轉吏部尙書祭酒如故永明元年遷金紫光祿大夫明年領南郡王師加給事中三年轉太子詹事緒每朝見武帝目送之謂王儉曰緒以位尊我我以德貴緒遷散騎常侍復領中正緒吐納風流聽之皆忘飢疲見者肅然如在宗廟雖終日與居莫能測焉劉俊之爲益州獻蜀柳數株武帝以植於太昌靈和殿前嘗賞玩咨嗟曰此楊柳風流可愛似張緒當年時其見愛如此七年竟陵王子良領國子祭酒武帝敕王晏曰吾欲令司徒辭祭酒以授張緒物議以爲何如子良竟不拜以緒領國子祭酒緒口不言利有財輒散之清談端坐或竟日無食門生見緒飢爲之辦餐然未嘗求也死

之日無宅以殯從弟融敬緒事之如親兄齎酒於靈前酌飲
慟哭曰阿兄風流頓盡追贈散騎常侍特進光祿大夫諡簡

子南

陸慧曉字叔明子真子清介正立不雜交游同郡張緒稱之曰
江東裴樂也初應州郡辟舉秀才歷諸府行參軍以母老還
養十餘年不仕齊高帝輔政除尚書殿中郎引爲太傅東閣
祭酒建元初遷太子洗馬廬江何點嘗稱慧曉心如照鏡遇
形觸物無不朗然慧曉與張融並宅其間有池池上有二株
楊柳點歎曰此池便是醴泉此木便是交讓及武陵王守會
稽上爲精選僚吏以慧曉爲功曹與府參軍劉璉同從述職

璉清介士也行至吳謂人曰吾聞張融與慧曉並宅其間有
水必有異味命駕往酌飲之曰飲此水則鄙吝之萌盡矣武
帝子廬陵王子卿爲南豫州刺史帝稱其小名謂竟陵王子
良曰烏熊癡如熊不得天下第一人爲行事無以壓一州乃
使慧曉爲長史行事別帝問曰卿何以輔持廬陵荅曰靜以
修身儉以養性靜則人不擾儉則人不煩上大悅後爲司徒
右長史尋遷西陽巴陵臨汝三府長史行府州事復爲西陽
王左軍長史領會稽郡丞行郡事隆昌元年徙爲晉熙王冠
軍長史江夏內史行郢州事慧曉歷輔五政立身清肅僚佐
以下造詣必起送之建武中遷吏部郎吏曹都令史歷政來

諮執選事慧曉任己獨行帝遣主書單景雋謂曰都令史悉
諳舊貫可共參懷慧曉曰六十之年不復能諮都令史爲吏
部郎也上若謂身不堪便當拂衣而退帝憚之後爲南兗州
刺史卒贈太常三子僚任倅並有美名時人謂之三陸南史
張融字思光暢子弱冠有名解褐爲宋新安王子鸞行參軍出
爲封溪令路經嶂嶮獠賊執融將殺食之融神色不動方作
洛生詠賊異之不害也浮海至交州於海中遇風終無懼色
作海賦以示顧覲之覲之曰卿此賦實超元虛但恨不道鹽
耳融卽求筆注曰漉沙構白熬波出素積雪中春飛霜暑路
覲之與融兄有恩好覲之卒融身負墳土在南與交阯太守

卞展善展於嶺南爲人所殺融挺身奔赴舉秀才對策中第
爲儀曹郎再遷南陽王友辟齊太傅掾稍遷中書郎張氏自
敷以來並以理音辭修儀範爲事至融風止詭越坐常危膝
行則曳步翹身仰首見者驚異聚觀成市而融了無慙色高
帝素愛融嘗曰此人不可無一不可有二融善草書自美其
能帝曰卿書殊有骨力但恨無二王法荅曰非恨臣無二王
法亦恨二王無臣法常歎云不恨我不見古人所恨古人不
見我爲長沙王鎮軍竟陵王征北諮議並領記室司徒從事
中郎融假東出武帝問融住何處荅曰臣陸處無屋舟居無
水後上問其從兄緒緒曰融近東出未有居止權牽小船於

岸上住上大笑遷司馬兼左長史融有孝義忌月三旬不聽樂事嫂甚謹父暢臨終謂諸子曰昔丞相事難吾以不同將見殺緣司馬竺超民得活爾等必報其子後超民孫微冬月遭母喪居貧融弔之悉脫衣以爲賻披牛被而反嘗以兄事微豫章王嶷竟陵王子良薨自以身經佐吏哭輒盡慟建武四年卒文集數十卷行於世自名爲玉海南史

張瓌字祖逸永子仕宋累遷桂陽內史不欲前兄瑋處祿自免不拜後爲司徒右長史初永拒桂陽王休範於白下敗績阮田夫等欲加罪齊高帝固申明之瓌由此感恩自結後遭親喪還吳持服昇明元年劉彥節有異圖弟遐爲吳郡潛相影

響高帝密遣殿中將軍卞白龍令瓌取遐諸張世有豪氣瓌宅中有父時舊部曲數百遐召瓌委以軍事瓌僞受命與叔恕領兵十八人入郡斬之郡內莫敢動事捷高帝卽授吳郡太守封義城縣侯郡人顧嵩陸閒並少年未知名瓌並引爲綱紀後並知名齊建元元年改封平都侯遷侍中出爲吳郡太守瓌以既有國秩不取郡奉高帝敕上庫別藏其奉以表其清武帝卽位爲寧蠻校尉雍州刺史加都督徵拜左民尙書加右軍將軍還後安陸王紆臨雍州行部有野老來乞紆問何不事業而行乞邪荅曰張使君臨州百姓家相保後人政嚴故至行乞紆由是深加嗟賞後拜太常歷吳郡太守光

祿大夫

南史

南史壞弟稷字公喬幼有孝性生母劉無寵遭疾時稷年十一侍養衣不解帶及終毀瘠杖而後起見年輩幼童輒哽咽泣淚州里謂之淳孝父永及嫡母邱相繼卒六年廬墓側自幼及長數十年中常設劉氏神坐出告反面如事生焉仕齊歷衛尉卿東昏淫虐北徐州刺史王珍國就稷謀乃使直閣張齊行弒於含德殿梁武帝時累遷尚書左僕射雖居朝右每慙口實出為青冀二州刺史州人徐道等夜襲州城乃害之稷歷官無畜聚奉祿皆頒親故家無餘財與族兄充融卷皆知名時目云充融卷稷為四張卷字令遠少以和理著稱能清言位都官天監初卒按稷身為弒主之人雖孝不足錄舊志皆列人物非是特其子岷以忠殉節能幹父盡而充融卷稷又張氏故事削之則有遺漏故附見於此

顧昌衍吳人居喪幾致滅性王儉言之天子曰昌衍既有至性

且張永之甥宜居禮闈以光郎署乃以為尚書庫部郎

南史

顧黯字長孺吳郡人有隱操齊永明元年詔徵為散騎侍郎不

就

齊書顧歡傳

顧憲之字士思覲之孫宋元徽中為建康令時有盜牛者與本主爭牛各稱已物前後令莫能決憲之至令解牛任其所去牛徑歸本主宅盜者始伏罪時號神明至於權要請託長吏貪殘據法直繩無所阿縱性又清儉為政甚得人和故都下飲酒者得醇旨輒號為顧建康謂其清且美也仕齊為衡陽內史先是郡境連歲疫死者大半棺槨尤貴悉裹以葦席棄之路旁憲之下車分告屬縣求其親黨悉令殯葬其家人絕滅者出公祿使綱紀營護之又土俗山人有病輒云先亡為

禍皆開冢剖棺水洗枯骨名爲除祟憲之曉喻爲陳生死之別事不相由風俗遂改時刺史王奐初至唯衡陽獨無訟者乃歎曰顧衡陽之化至矣若九郡率然吾將何事後爲東中郎長史行會稽郡事山陰人呂文度有寵於齊武帝於餘姚立邸頗縱橫憲之至郡卽日除之文度後還葬郡縣爭赴弔憲之不與相聞文度甚銜之卒不能傷也遷南中郎巴陵王長史南兖南豫二州事典籤諮事未嘗接以顏色動遵法制加建威將軍行婺州事司徒竟陵王於宣城臨城定陵三縣界立屯封山澤數百里禁人樵採憲之固陳不可言甚切直王曰非君無以聞此德音卽命罷屯禁遷給事黃門兼尙書

吏部郎中宋時其祖覬之嘗爲吏部於庭植嘉樹謂人曰吾爲憲之植耳至是憲之果爲此職永元中爲豫章內史在任清簡務存寬惠有貞婦萬晞少孀居無子事舅姑尤孝父母欲奪嫁之誓死不許憲之賜以束帛表其節義梁武帝爲揚州牧徵憲之爲別駕從事史比至已授禪憲之風疾漸篤固求還吳就加大中大夫憲之雖累經宰郡資無儋石及歸環堵不免飢寒臨終爲制敕其子薄葬素祭所著詩賦銘贊并衡陽郡記數十篇

南史

陸超之吳人爲江州刺史晉安王子懋防閤以清靜雅爲子懋所知延興元年子懋聞鄱陽隨郡二王見殺欲起兵赴難與

趙之議傳檄荆郢入討君側明帝遣軍主裴叔業先襲尋陽
遣將隨子懋參軍于琳之入城害子懋琳之勸趙之逃亡趙
之曰人皆有死此不足懼吾若逃亡非惟孤晉安之眷亦恐
田橫客笑人端坐待命趙之門生姓周者謂殺趙之當得賞
乃伺趙之坐自後斬之頭墜而身不僵王元邈嘉其節厚爲
殯斂周又助舉棺未出戶棺墜政壓其頭折卽死

南史齊晉
安王子懋

陸閑字遐業慧曉兄子有風概不苟合少爲同郡張緒所知仕
至揚州別駕齊明帝崩閑謂所親曰宮車晏駕百司將聽冢
宰主上地重才弱必不能振難將至矣乃感心疾不復預州

事永元末刺史始安王遙光據東府作亂或勸去閑曰吾爲
人吏何可逃死臺軍攻陷城閑以綱佐被收尙書徐孝嗣啓
閑不預逆謀未及報徐世標命殺之閑四子厥絳完襄絳字
魏卿時隨閑抱頸求代死不獲遂以身蔽刀刃行刑者俱害

之南
史

陸厥字韓卿閑長子少有風概好屬文齊永明九年州舉秀才
時盛爲文章沈約謝朓王融以氣類相推轂周顥善識聲韻
約等文皆用宮商將平上去入四聲制韻世呼爲永明體厥
與約書謂一人之思遲速天懸一家之文工拙壤隔何獨宮
商律呂必責其如一邪論者可言未窮其致不得言曾無先

覺也始安王遙光反厥父被誅厥坐繫尚方尋有赦厥感慟而卒年二十八文集行於世南史

張沖字思約邵孫柬之子出繼伯父敷沖少有至性隨從叔永爲將帥除盱眙太守齊永明八年爲假節監青冀二州行刺史事父初卒遺命祭我必以鄉土所產無用牲物沖在鎮四時還吳國取果菜每至蒸嘗輒流涕薦焉仍轉刺史永元元年爲南兖州刺史遷司州裴叔業以壽春降魏又遷沖南兖州刺史並未拜崔慧景事平徵建安王寶夤還都以沖爲郢州刺史一歲之中頻受四州刺史至是乃受任封定襄侯梁武帝起兵手書喻意又遣辨士說之沖確然不回東昏遣驍

騎將軍薛元嗣制局監暨榮伯領兵及糧運送沖使拒西師元嗣等懲劉山陽之敗疑沖不敢進停住夏首浦聞梁武師將至元嗣榮伯相率入郢城時竟陵太守房僧寄被代還至郢東昏敕僧寄留守魯山除驍騎將軍僧寄謂沖曰下官蒙先帝厚澤實欲微立塵効沖深相許共結盟誓分部拒守遣軍主孫樂祖數千人助僧寄據魯山岸立城壘明年二月梁武圍魯山城遣軍主曹景宗等過江攻郢城沖中兵參軍陳光靜等閒出擊之光靜戰死沖固守不出病將死厲府僚以誠節言終而卒東昏詔贈沖散騎常侍護軍將軍南史

梁

張充字延符緒子少好逸遊緒嘗告歸至吳始入西郭逢充獵
右臂鷹左牽狗遇緒船至便放繮脫鞬拜於水次緒曰一身
兩役無乃勞乎充跪曰充聞三十而立今充二十九矣請至
來歲緒曰過而能改顏氏子有焉及明年便修改多所該通
尤明老易能清言歷尚書殿中郎武陵王友時王儉用事齊
武帝欲以緒爲尚書僕射儉執不可充以爲愠與儉書盛自
標高致儉以書示緒緒杖之百又爲御史中丞到撫所奏免
官禁錮久之爲司徒諮議參軍與王思遠陸慧曉等並爲司
徒竟陵王賓客累遷義興太守爲政清靜吏人便之梁天監
初歷太常卿吏部尚書居選以平允稱再遷散騎常侍國子

祭酒登堂講說皇太子以下皆至時王侯多在學執經以拜
充朝服而立不敢當再遷尚書僕射出爲吳郡太守下車卹
貧老故舊莫不欣悅卒於吳諡穆子南史

陸杲字明霞徽孫父叡揚州中從事杲少好學工書畫舅張融
有高名杲風韻舉止頗類時稱曰無對日下唯舅與甥爲司
徒從事中郎梁臺建爲相國西曹掾天監五年位御史中丞
性倖直無所顧望時山陰令虞肩在任贓汙數百萬杲奏收
劾之中書舍人黃睦之以肩事託杲杲不荅梁武聞之以問
杲杲荅曰有之帝曰識睦之否荅曰不識時睦之在御側上
指示曰此人是也杲謂曰君小人何敢以罪人屬南司睦之

失色領軍將軍張稷是杲從舅杲嘗以公事彈稷稷因侍宴
訴帝曰陸杲是臣通親小事彈臣不貸帝曰杲職司其事卿
何得爲嫌杲在臺號不畏強禦爲義興太守在郡寬惠爲下
所稱後入爲金紫光祿大夫特進四年卒謚質子

南史

陸倕字佐公慧曉子少勤學善屬文於宅內起兩間茅屋杜絕
往來晝夜讀書如此者數歲所讀一徧必誦於口嘗借人漢
書失五行志四卷乃暗寫還之略無遺脫幼爲外祖張岱所
異謂諸子曰此兒汝家陽元也十七舉秀才竟陵王子良開
西邸延英俊倕與焉梁天監初爲右軍安成王主簿與樂安
任昉友爲感知己賦以贈昉及昉爲御史中丞簪裾輻湊預

其讌者殷芸到漑劉苞劉孺劉顯劉孝綽及倕而已號曰龍
門之遊遷臨川王東曹掾梁武帝雅愛倕才敕撰新漏刻銘
其文甚美遷太子中舍人詔爲石闕銘敕褒美之賜絹三十
疋累遷太常卿卒子纘早慧十歲通經爲童子郎卒次緬有
似於倕一看殆不能別

南史

陸璉吳郡人天監四年詔開五館建立國學總以五經教授置
五經博士各一人以璉及沈峻等補博士各主一館館有數
百生給其稟餼其射策通明經者卽除爲吏於是懷經負笈
者雲會矣峻字士嵩武康人博通五經尤長三禮傳峻業者
吳郡張及會稽孔子雲官皆至五經博士

南史儒
林傳序

陸襄字師卿厥第四弟天監三年都官尚書范岫表薦起家著作佐郎後昭明太子聞襄業行啓武帝引與游處除太子洗馬遷中舍人並掌管記出爲揚州中從事以父終此官固辭武帝不許聽與府司馬換廨居之襄母年將八十太子月遣存問加賜珍羞衣服母嘗猝患心痛醫方須二升粟漿時冬月日又逼暮求索無所忽有老人詣門貨漿量如方劑始欲酬直無何失之時以襄孝感所致後爲太子家令復掌管記母憂去職襄年已五十毀頓過禮太子憂之遣使誠喻大通七年出爲鄱陽內史大同元年郡人鮮于琮殺廣晉令王筠號上願元年署置官屬將出攻郡襄先率人吏修城隍爲備

及賊至破之生獲琮時郡守宰案其黨與因求貨賄皆不得實或有善人罹禍惟襄郡枉直無濫人作歌曰鮮于鈔後善惡分人無橫死賴陸君又有彭李二家因忿爭相誣告襄引入內室和言解喻二人感恩深自悔咎乃爲設酒食令其盡歡酒罷同載而還因相親厚人又歌曰陸君政無怨家鬪旣罷讎共車在政六年郡中大寧郡人李睨等四百二十人詣闕陳襄德化求於郡立碑敕許之又表乞留襄固乞還太清元年爲度支尚書侯景圍臺城以襄直侍中省城陷奔還吳景將宋子仙攻錢塘會陸黥舉義襲郡殺僞太守蘇單子推襄行郡事淮南太守蕭寧逃賊入吳襄遣迎寧爲盟主遣

黯及兄子映公帥眾躡子仙與戰於松江黯敗走吳下軍聞之亦散襄匿於墓下一夜憂憤卒襄弱冠遭家禍釋服猶若居憂終身蔬食布衣不聽音樂口不言殺害五十年侯景平贈侍中追封餘干縣侯

南史

顧協字正禮和六世孫幼孤隨母養於外氏外從祖張永嘗攜內外孫姪遊虎邱協年數歲永撫之曰兒欲何戲協曰兒正欲枕石漱流永歎息曰顧氏興於此子及長好學初爲揚州議曹從事史兼太學博士舉秀才尚書令沈約覽其策歎曰江左以來未有斯作遷安成王國左常侍兼廷尉正太尉臨川王聞其名召掌書記除安都令未至縣遭母憂送喪還於

峽江遇風同旅皆漂溺惟協一舫觸石得泊焉咸謂精誠所致累遷湘東王參軍事兼記室普通中有詔舉士湘東王表薦之卽召拜通直散騎侍郎兼中書通事舍人後守鴻臚卿自爲近臣便繁幾密每有述製敕前示協時輩榮之卒官無衾以歛武帝悼惜之爲舉哀贈散騎常侍諡曰溫子協少清介有志操初爲廷尉正冬服單薄寺卿蔡法度欲解襦與之憚其清嚴不敢發口及爲舍人同官者皆潤居協在省十六載器服飲食不改於常自丁艱後終身布衣蔬食少時將聘舅息未成婚而協母亡免喪後不復娶至六十餘此女猶未他適協義而迎之卒無嗣協博極羣書於文字及禽獸草木

尤稱精詳撰異姓苑五卷瑣語十卷文集十卷並行於世南史
張率字士簡瓌子十二能屬文常日限爲詩一篇或數日不作
則追補之稍進作賦頌至年十六向作二千餘首有虞訥者
見而詆之率乃一旦焚毀更爲詩示焉託云沈約訥句句嗟
稱無字不善率曰此吾作也訥慙而退時陸少元家有父澄
書萬餘卷率與少元善遂盡讀其書梁天監中爲司徒謝朓
掾直文德待詔省敕使抄乙部書又使撰古婦人事寫給後
宮取假東歸論者謂爲傲世率懼乃爲待詔賦奏之手敕荅
曰相如工而不敏枚臯速而不工卿可謂兼二子矣又侍宴
賦詩武帝別賜率詩率奏詩往反六首後引至玉衡殿謂曰

卿東南物望祕書丞天下清官今以相處爲卿定名譽尋以
爲祕書丞四年禊飲華光殿其日河南國獻赤龍駒詔率與
到漑周興嗣爲賦帝以率爲工父憂去職七年除建安王中
記參軍俄直壽光省修丙丁部書鈔累遷晉安王宣惠諮議
參軍率在府十年恩禮甚篤歷黃門侍郎出爲新安太守丁
所生母憂卒率嗜酒不事於家務尤忘懷在新安遣家僮載
米三千石還宅及至遂耗大半率問其故荅曰雀鼠耗率笑
曰壯哉雀鼠竟不研問自少屬文七略及藝文志所載詩賦
今亡其文者並補作之所著文衡十五卷文集四十卷弟盾
字士宣以謹重稱爲湘東王記室出監富陽令廓然獨處無

所用心身死家無遺財唯文集并書千卷酒米數甕而已

南史

陸煦杲弟學涉有思理位太子家令撰晉書未就著陸史十五

卷陸氏驪泉志一卷並行於時子罩字洞元少篤學多所該

覽善屬文簡文居藩為記室參軍稍遷太子中庶子禮遇甚

厚以母老求去公卿祖道皇太子賜黃金五十斤時人方之

疏廣後終光祿卿

南史

陸雲公字子龍襄兄完子五歲誦論語毛詩九歲讀漢書略能

記憶從祖倅與劉顯質問十事雲公對無所失顯歎異之及

長好學有才思為平西湘東王繹行參軍雲公先製泰伯廟

碑吳興太守張纘罷郡經途讀其文歎曰今之蔡伯喈也纘

至都掌選言之武帝召為尚書儀曹郎累遷中書黃門郎兼

掌著作雲公善弈碁嘗夜侍坐武冠觸燭火帝笑謂曰燭燒

卿貂帝將用為侍中故以此戲之時天泉池新製鰕魚舟帝

暇日泛此舟唯引劉之遴到漑失昇雲公年位尚輕亦預焉

太清元年卒從父兄才子亦有才名位太子中庶子廷尉卿

與雲公並有文集行世

南史

皇侃吳郡人青州刺史皇象九世孫少好學師事會稽賀瑒盡

通其業尤明三禮孝經論語為國子助教於學講說聽者常

數百人撰禮記講疏五十卷奏上詔付秘閣頃之名入壽光

殿說禮記義武帝善之加員外散騎侍郎侃性至孝嘗日限

誦孝經二十遍丁母艱還鄉里西平邵陵王欽其學厚禮迎之因感心疾卒所撰論語義禮記義見重於世

南史

張嶷字四山父稷初爲剡令至嶷亭生之因名少敦孝行年三十餘猶斑衣受稷杖動至數百收淚歡然方雅有志操能清言感家禍終身蔬食布衣手不執刀及不聽音樂弟淮言氣不倫嶷垂泣訓誘起家秘書郎累遷鎮南湘東王長史尋陽太守王暇日爲之筮得節卦謂嶷曰卿後當東入爲郡恐不得終其天年嶷曰貴得其所耳還爲太府卿吳興太守侯景圍建業遣弟伊率郡兵赴援城陷御史中丞沈沒遼難東歸嶷往見之謂曰賊臣憑陵人臣効命之日今欲收集兵及保

據貴鄉雖復萬死誠亦無恨浚固勸嶷舉義時邵陵王綸東奔至錢塘聞之遣前舍人陸邱公板授嶷征東將軍嶷曰天子蒙塵今日何情復受榮號留板而已賊行臺劉神茂攻破義興遣使說嶷嶷斬其使仍遣軍破神茂侯景乃遣其中軍侯子鑒助神茂擊嶷嶷軍敗乃釋戎服坐於廳事賊臨以及終不屈執送景將舍之嶷曰速死爲幸乃殺之子弟遇害者十餘人景欲存其一子嶷曰吾一門已登鬼籙不就爾處求恩於是皆死賊平元帝追贈侍中中衛將軍開府儀同三司

諡忠貞

南史

許孝敬吳人小名嗣兒勁勇過人爲梁主督驍將以大將軍守

蘇州府志 卷四十一
河東陳將吳明徹來攻無救援爲明徹所禽戮於建康市贈
車騎大將軍周書

陳

陸山才字孔章吳人祖翁寶梁尚書水部郎父汎散騎常侍山
才少倜儻好尚文史范陽張纘纘弟綰並欽重之紹泰中都
督周文育出鎮南豫州不知書疏以山才爲長史政事悉以
委之文育討剋蕭勃禽歐陽頎計畫多出山才後文育重鎮
豫章金口山才復爲鎮南長史豫章太守文育爲熊曇朗所
害曇朗囚山才等送於王琳未至而侯安都敗琳將常衆愛
由是山才獲返累遷散騎常侍西陽武昌二郡太守卒諡簡

子南
史

張種字士苗永從孫祖辯宋廣州刺史父略梁臨海太守種少
恬靜居處雅正傍無造請時人語曰宋稱敷演梁則卷充清
虛學尙種有其風仕梁爲中軍宣城王府主簿時已四十餘
家貧求爲始豐令武陵王紀爲益州刺史重選府僚以種爲
左西曹掾種辭以母老坐免侯景之亂奉母東奔鄉里母卒
種時年五十而毀瘠過甚又迫以凶荒未葬服雖畢居家飲
食恒若在喪景平王僧辯奏起爲從事并爲具葬禮葬訖種
方卽吉僧辯又以種年老無子賜以妾及居處之具陳武帝
受禪爲太府卿歷位左民尙書侍中中書令金紫光祿大夫

種沈深虛靜識量宏博時以爲宰相之器僕射徐陵嘗抗表讓位於種以爲宜居左執其爲所推如此卒贈特進諡元子種仁恕寡欲雖歷顯位家產屢空終日晏然不以爲病有集十四卷種弟稜亦清靜有識度位司徒左長史南史陸繕字士繡倕兄子父任御史中丞繕幼有志尚以雅正知名梁承聖中爲中書侍郎掌東宮管記魏平江陵繕微服遁還建業紹泰元年除司徒右長史御史中丞以父任所終固辭陳武帝受命位侍中出爲新安太守文帝嗣位徵爲太子中庶子領步兵校尉掌東宮管記繕儀表端麗進退閑雅文帝使太子諸王咸取則焉後復拜御史中丞固辭不許乃權換

解宇徙居之太建中歷尚書左僕射參掌選事別敕與徐陵等七人參議政事卒贈特進諡曰安子以繕東宮舊臣特賜祖奠子年數歲詔引入殿內應對進止有父風宣帝賜名辯慧字敬仁繕兄子見賢亦方雅位少府卿卒南史

陸慶吳郡人少好學遍知五經尤明春秋左氏傳節操甚高釋褐梁武陵王國右常侍歷征西府墨曹行參軍除婁令陳天嘉初徵爲通直散騎侍郎不就永陽王爲吳郡太守聞其名欲與相見慶固辭以疾時宗人陸榮爲郡五官掾慶嘗詣焉王乃微服往榮第穿壁觀之謂榮曰觀陸慶風神凝峻殆不可測嚴君平鄭子真何以尚茲鄱陽晉安王俱以記室徵並

不就乃築室屏居以禪誦為事由是傳經受業者蓋鮮焉陳書

慶子士季
見孫南金傳

陸子隆字興世吳郡人祖傲之梁嘉興令父俊封氏令子隆少慷慨有志功名侯景之亂於鄉里聚徒時張彪為吳郡太守引為將帥隨彪徙鎮會稽及文帝討彪彪將沈泰等皆降而子隆力戰敗績文帝義之復使領其部曲文帝嗣位領甲仗宿衛封益陽縣子累遷廬陵太守周迪據臨川反子隆隨章昭達討迪迪退走因隨昭達討陳寶應晉安平子隆功最遷武州刺史改封朝陽縣伯華俊據湘州反以子隆居其心腹皎深患之頻遣使招子隆不從攻又不剋及皎敗於郢州子

隆出兵襲其後因與大軍相會進爵為侯尋遷都督荊州刺史荊州新置治公安城池未固子隆修立城郭綏集夷夏甚得人和號為稱職吏人詣闕求立碑頌美功績詔許之卒謚威子子之武嗣年十六領其舊軍後為弘農太守隸吳明徹於呂梁軍敗逃歸為人所害子隆弟子才亦有幹畧從子隆征討有功除始平太守封始康縣子卒於信州刺史南史孫瑒字德璉吳人父修道梁中散大夫以雅素知名瑒少儻好謀略博涉經史尤便書翰仕梁為邵陵王中兵參軍事太清之難授假節宣猛將軍軍主王僧辯之討侯景也王琳為前軍琳與瑒親姪乃表薦為宜都太守後以軍功封富陽侯

敬帝立累遷巴州刺史陳武帝受禪王琳立梁永嘉王蕭莊於郢州徵瑒爲少府卿仍徙都督郢州刺史周遣大將史寧乘虛攻之瑒兵不滿千人乘城拒守周兵不能克及聞大軍敗王琳乘勝而進周兵乃解瑒於是盡有中流之地遣使奉表歸陳天嘉元年授湘州刺史封定襄縣侯瑒懷不自安乃固請入朝徵爲散騎常侍中領軍未拜文帝謂曰昔朱買臣願爲本郡卿豈有意乎改授吳郡太守給鼓吹一部秩滿徵拜散騎常侍中護軍及留異反東陽詔瑒督舟師進討異平遷鎮右將軍出爲建安太守大建四年爲都督荊州刺史出鎮公安瑒增修城池爲鄰境所憚居職六年以公事免及吳

明徵軍敗呂梁詔授都督緣江水陸諸軍事尋授都督郢州刺史十二年坐疆場交通抵罪後主嗣位復爵邑歷度支尙書侍中祠部尙書後主頻幸其宅賦詩述勲德之美遷五兵尙書領左軍將軍禎明元年卒官謚曰桓瑒事親以孝聞於諸弟甚篤睦性通泰財物散之親友居處頗失於侈又巧思過人爲起部尙書軍國器械多所創立場三十一子第二子

訓頗知名位高唐太守

南史參陳書

陸瓊字伯玉雲公子幼聰慧有思理六歲爲五言詩頗有詞采大同末雲公受詔較定棋品瓊時八歲於客前覆局由是都下號曰神童朱异言之武帝召見瓊風神警亮進退詳審帝


甚異之十一丁父憂毀瘠有至性從祖襄歎曰此兒必荷門
基所謂一不爲少及侯景作逆攜母避地於縣之西鄉勤苦
讀書晝夜無怠遂博學善屬文陳天嘉中以文學累遷尙書
殿中郎瓊素有令名深爲文帝所賞及討周迪陳寶應等都
官符及諸大手筆並敕付瓊遷新安王文學掌東宮管記宣
帝爲司徒妙簡僚佐徐陵薦瓊除司徒左西掾尋兼通直散
騎常侍聘齊大建中爲給事黃門侍郎轉中庶子領大著作
撰國史後主卽位直中書省掌詔誥至德元年除度支尙書
參選事掌詔誥并判廷尉建康二獄事初雲公奉梁武敕撰
嘉瑞記瓊述其旨而續焉自永定訖於至德勒成一家之言

遷吏部尙書著作如故瓊詳練譜牒雅有識鑒號爲稱職性
謙儉不自封植雖位望日隆而執志逾下園池室宇無所改
作車馬衣服不尙鮮華四時俸祿散之宗族暮年深懷止足
思避權要恒謝疾不視事丁母憂哀慕過毀至德四年卒有
文集二十卷行於世子從典字由儀幼聰敏八歲讀沈約集
見回文研銘援筆擬之便有佳致十二作柳賦其詞甚美從
父瑜特所賞愛及瑜將終命家中墳籍皆付之從典乃集瑜
文爲十卷仍製集序其文甚工從典篤好學業博涉羣書位
太子洗馬司徒左西掾陳亡入隋位著作佐郎尙書右僕射
楊素奏從典續司馬遷史記迄於隋其書未就坐弟受漢王

諒職免後卒於南陽縣主簿南史

陸琰字溫玉瓊從父弟父令公梁中軍宣城王記室參軍琰幼孤好學有志操州舉秀才累遷宣惠始興王外兵參軍直嘉德殿學士陳文帝聽覽餘暇頗留心史籍以琰博學善占誦引置左右嘗使製刀銘琰援筆即成無所點竄帝嗟賞久之賜衣一襲俄兼通直散騎常侍副琅邪王厚聘齊及至鄴而厚病卒琰自為使主時年二十餘風神韶亮占對閑敏齊士大夫甚傾心焉太建初為武陵王明威府功曹史兼東宮管記丁母憂去官卒至德二年追贈司農卿所製文詞多不存本後主求其遺文撰成一卷南史

陸瑜字幹玉琰弟少篤學美詞藻州舉秀才再遷軍師晉安王外兵參軍東宮學士兄琰時為管記並以才學娛侍左右時人比之二應太建中累遷太子洗馬中舍人瑜聰敏強記嘗受莊老於汝南周弘正學成實論於僧滔法師並通大旨時皇太子好學欲博覽羣書以子集繁多命瑜鈔撰未就而卒太子為之流涕親製祭文仍與江總論述其美至德二年追贈光祿卿有集十卷瑜有從父兄玠從父弟琛玠字潤玉梁大匠卿晏子之子弘雅有識度好學能屬文後主在東宮徵為管記仍除中舍人以疾失明還鄉里卒贈少府卿琛字潔玉臨川王長史邱公之子少警俊事後母以孝聞後主嗣位



為給事黃門郎中書舍人參掌機密坐漏泄禁中語賜死南史

陸詡吳郡人少習崔靈恩三禮義宗梁世百濟國表求講禮博

士詔令詡行還除給事中定陽令天嘉初侍始興王伯茂讀

遷尚書祠部郎中

陳書

顧野王字希馮吳人祖子喬梁東中武陵王府參軍事父烜信

威臨賀王記室俱以儒術知名野王幼好學七歲讀五經略

知大指九歲能屬文嘗制日賦朱异見而奇之年十二隨父

之建安撰建安地記二篇長而徧觀經史精記默識天文地

理著龜占候蟲篆奇字無所不通宣城王為揚州刺史野王

及琅邪王褒並為賓客王甚愛其才野王又善丹青王於東

府起齋令野王畫古賢命褒書贊時稱二絕及侯景亂野王

丁父憂歸本郡乃召募鄉黨隨義軍援都野王體素清羸裁

長六尺又居喪過毀殆不勝衣及杖戈被甲陳君臣之義逆

順之理抗辭作色見者莫不壯之城陷逃會稽陳天嘉中敕

補撰史學士太建中為太子率更令尋領大著作掌國史知

梁史事後為黃門侍郎光祿卿知五禮事卒贈秘書監右衛

將軍野王少以篤學至性知名在物無過辭失色觀其容貌

似不能言其厲精力行皆人所莫及所撰有玉篇輿地志符

瑞圖顧氏譜分野樞要續洞冥記元象表並行於世有文集

二十卷南史

張昭字德明吳人幼有孝性父熯常患消渴嗜鮮魚昭乃身自結網捕魚以供朝夕弟乾字元明聰敏博學亦有至性父卒兄弟並不衣綿帛不食鹽酢日惟食一升麥屑粥每感動必嘔血鄰里聞其聲皆為涕泣父服未終母陸又亡兄弟遂六年哀毀形容骨立家貧未得大葬布衣蔬食十餘年杜門不出屏絕人事時衡陽王伯信臨郡舉乾孝廉固辭不就兄弟並因毀成疾年未五十並終於家子嗣俱絕

陳書

盧王二志明一統志南朝諸陸內俱載陸通陸逞兄弟二人按二人仕魏周其曾祖載自宋初沒赫連氏遂入北土不當復引為吳中人物故去之

蘇州府志卷第四十八

蘇州府志卷第四十九

人物三

吳縣

隋

潘徽字伯彥吳郡人性聰敏少受禮於鄭灼受詩於施公受書於張冲講莊老於張機並通大義尤精三史善屬文能持論陳尚書令江總甚敬之釋褐新蔡王國侍郎選為客館令隋遣魏澹聘陳陳使徽接對之陳滅為州博士秦孝王俊聞其名召為學士嘗從俊朝京師令徽馬上為賦行一驛而成名曰述恩賦俊覽而善之復令為萬字文并遣撰集字書名為韻纂凡三十卷俊薨晉王廣復引為揚州博士令與諸儒撰

江都集禮煬帝嗣位詔與陸從典褚亮歐陽詢等助楊素撰
魏書授京兆博士楊元感兄弟甚重之數相往來及元感敗
出為西海郡威定縣主簿行至隴西病卒時錢塘褚亮貶西
海司戶俱在道中為之斂瘞人皆義之

隋書

褚輝字高明吳郡人以三禮學稱於江南煬帝時徵天下儒術
之士悉集內史省相次講論綴博辯無能屈者由是擢為太

學博士撰禮疏一百卷

隋書

徐孝穎吳人祖麟梁侍中石陽侯父樞陳尚書起部郎孝穎勤
學多覽善屬文性至孝丁母憂三年衰經不離身經冬不御
綿纈形體骨立每哭臨哀聲徹於郡邑聞者亦為隕涕嘗在

園中晝臥見人盜菜徐轉身向裏恐盜見之其仁行謙退皆

此類也仕煬帝為學士校書郎

大業
禠記

陸士秀字南容吳郡人博通百家之言幼時在陳容儀迅舉齊
使李駒駮至江南問江南有孟婆是何神也士秀曰山海經
云帝之二女游於江郭璞注云天帝二女尊之為神由此言
之則孟婆也以天帝女尊之為孟猶郊祀志以地神為泰媪
也駒駮曰僑南之辨無以加焉後在隋為學士或謂曰後魏
書稱王肅論於孝文前肅曰惟有女子笄男子無笄劉芳曰
男子亦有笄引內則為證肅乃嘆曰今日方知劉石經芳可
謂博物君子乎士秀曰內則兼男子之言子事父何足以明

男之有笄男子有笄布在經傳劉芳儒者不能博物羣書容或不悉王肅多聞之士無不知時王肅劉芳獨暗斯事引內則謂之不經斯不然矣此乃魏收不稽古而虛美劉芳非芳

雅論誠損之也

盧熊蘇州志

唐

陸摛字士紳吳郡人祖映梁侍中父陟諮議參軍世有文集摛不墜家聲隋仁壽中召補春官學士大業中為燕王記室唐

貞觀中授朝散大夫魏王府文學

大業禠記

陸元朗字德明以字行吳人善名理言受學於周弘正陳後主為太子集名儒入講承光殿德明始冠與下坐祭酒徐孝克

敷經倚貴縱辯眾多下之獨德明申荅屢奪其說舉坐咨賞釋褐始興國左常侍陳亡歸鄉里隋煬帝擢祕書學士大業間廣召明經士德明與魯達孔褒共會門下省相酬難莫能詘遷國子助教越王侗署為司業入殿中授經王世充僭號封子元恕為漢王以德明為師即其廬行束脩禮德明恥之服巴豆劑僵偃東壁下元恕入拜牀前德明對之遺利不復開口遂移病成臯世充平秦王辟為文學館學士以經授中山王承乾補太學博士高祖已釋奠召博士徐文遠浮屠慧乘道士劉進善各講經德明隨方立義徧析其要帝大喜曰三人者誠辨然德明一舉輒蔽可謂賢矣賜帛五十疋遷國

子博士封吳縣男卒論撰甚多傳於世後太宗閱其書嘉德明博辯以布帛二百段賜其家子敦信麟德中由左侍極檢

校右相累封嘉興縣子

唐書

朱子奢吳人從鄉人顧彪授左氏春秋善文詞隋大業中爲直祕書學士天下亂辭疾還鄉里後從杜伏威入朝授國子助教貞觀初高麗百濟同伐新羅連年兵不解新羅告急帝假子奢員外散騎郎持節諭旨平三國之憾子奢有儀觀夷人尊畏之二國上書謝罪贈遺甚厚初子奢行帝戒曰海夷重學卿爲講大誼然勿入其幣還當以中書舍人處卿子奢至其國爲發春秋題納其美女帝責違旨而猶愛其才以散官

直國子學累轉諫議大夫弘文館學士始武德時太廟止四室高祖將祔廟子奢建議請依古爲七廟帝嘗欲觀起居紀錄子奢曰陛下所舉無過事雖見無嫌然以此開後世史官之禍深可懼也史官全身畏死則悠悠千載尙有聞乎子奢爲人樂易能劇談以經誼緣飾每侍宴帝令論難羣臣恩禮甚篤卒於官

唐書

顧允蘇州吳人祖越陳給事黃門侍郎父覽隋祕書學士允永徽中歷遷起居郎兼修國史撰太宗實錄成加朝散大夫弘文館學士以撰武德貞觀兩朝國史成加朝請大夫封餘杭縣男又賜帛五百段龍朔三年遷司文郎中尋卒允又撰漢

書古今集二十卷行於代舊唐書子琮武后時為天官侍郎同

鳳閣鸞臺平章事卒后曰琮不幸令雖不舉哀然朕以股肱

特廢視事一日唐書按允之祖越本鹽官人見流寓

陸元方字希仲吳人陳黃門侍郎琛曾孫伯父柬之善書名家

官太子司議郎元方初明經後舉八科皆中累轉監察御史

武后時使嶺外涉海風濤驚壯舟人懼元方曰我受命不私

神豈害我趣使濟而風息還除殿中侍御史擢鳳閣舍人秋

官侍郎為來俊臣所陷后置不罪遷鸞臺侍郎坐附會李昭

德貶綏州刺史擢天官侍郎兼司衛卿或言其薦引皆親黨

后怒免官令白衣領職元方薦人如初后召讓之對曰舉臣

所知不暇問仇黨又薦其友崔元暉有宰相才后知無他復

拜鸞臺侍郎同平章事后嘗問外事對曰臣備位宰相大事

當白奏民間碎務不敢以聞忤旨下除太子右庶子進文昌

左丞卒元方素清慎再執政每進退羣臣后必先訪問外秘

莫知臨終取奏橐焚之曰吾陰德在人後當有興者贈越州

都督諸子皆美才象先景倩景融尤知名唐書

陸餘慶元方從父陳右衛將軍珣孫方雅有祖風已冠名未顯

兄元表曰爾名宦不立奈何餘慶感激閉戶誦書三年以博

學稱舉制策甲科補蕭尉累遷陽城尉武后封嵩山以辦具

勞擢監察御史聖歷初靈勝二州黨項誘北胡寇邊詔餘慶

招慰喻以恩信蕃酋率眾內附遷殿中侍御史鳳閣舍人封
 廣平郡公太子右庶子餘慶於寒品晚進必悉力薦藉人有
 過輒面折退無一言開元初為河南河北宣撫使薦孫逖韋
 述蔣冽達奚珣後皆知名遷大理卿終太子詹事諡曰莊餘
 慶雅善趙貞固盧藏用陳子昂杜審言宋之問畢構郭襲微
 司馬承禎釋懷一號方外十友餘慶才不逮子昂等而風流
 敏辨過之初武后時酷吏用事中宗朝倖臣貴主斜封大行
 陷利嗇禍之人與相乾沒雖亟貴驟用而戮不反踵餘慶以
 道自將雖仕不赫赫訖無悔尤唐書

朱佐日吳郡人兩登制科三為御史子承慶年十六登秀才科

代濟其美武后嘗吟詩曰白日依山盡黃河入海流欲窮千

里日更上一層樓問是誰作李嶠對曰御史朱佐日詩也賜

綵百疋轉侍御史承慶嘗為昭陵輓詞入高等由是父子齊

名翰林盛事

陸象先字崇賢元方子器識沈遠舉制科高第為揚州參軍事

時吉頊與元方同為吏部侍郎頊擢象先為洛陽尉元方不

肯當頊曰為官擇人豈以吏部子廢至公邪卒以授俄遷監

察御史累授中書侍郎景雲中進同中書門下平章事監修

國史初太平公主謀引崔湜為宰相湜曰象先人望宜幹樞

近若不者湜敢辭主不得已為言之遂並知政事然其性恬

靜寡欲議論高簡為時所推向公主既擅權宰相爭附之象先未嘗往謁及謀逆召宰相議曰寧王長不當廢嫡立庶象先曰帝得立何也主曰帝有一時功今失德安可不廢對曰立以功者廢必以罪今不聞天子過失安得廢主怒更與竇懷貞等謀卒誅死時象先與蕭至忠岑羲等坐為主所進將同誅元宗遽召免之曰歲寒然後知松栢之後凋也以保護功封兗國公初難作睿宗御承天樓羣臣稍集帝麾曰助朕者留不者去於是投名自驗者事平元宗得所投名詔象先收按象先悉焚之帝大怒欲并加罪頓首謝曰赴君之難忠也陛下方以德化天下奈何殺行義之人故臣違命安反

側者其敢逃死帝寤善之時窮治忠義等黨與象先密為申救保全甚眾罷為益州大都督府長史劍南按察使為政尚仁恕累徙蒲州刺史兼河東按察使嘗曰天下本無事庸人擾之為煩耳故所至民吏懷之入為太子詹事歷戶部尚書知吏部選事母喪免起為揚州大都督府長史遷太子少保卒年七十二贈尚書右丞相諡文貞始象先名景初睿宗曰子能紹先構是為象賢者乃賜名焉

唐書

陸景倩象先弟為扶溝丞河南按察使畢構覆州縣殿最欲必得實有吏言狀曰某強清某詐清唯景倩曰真清終監察御

史唐書

陸景融長七尺美姿質寬中而厚外博學工筆札以蔭補千牛
轉新鄭令政有風績累遷工部尚書東京留守贈廣陵郡都
督景融於象先後母弟也象先被笞景融諫不入則自楚母
為損威人多其友

唐書

陸瓌字仲采餘慶子舉明經補長安尉以清幹稱開元初改新
鄉令人為立祠累遷兵部郎中東曠騎使還除洛陽令時車
駕在洛摧勒姦豪人不敢犯為中書令蕭嵩所器重嵩罷他
宰相俾陰廉嵩瓌曰與人交過且不言况無有邪以是忤
貴近出為太原少尹累徙西河太守封平恩縣男屬邑多虎
前守設檻穽瓌至撤之虎不為暴

唐書

陸南金蘇州吳人祖士季從同郡顧野王學左氏春秋司馬史
班氏漢書仕隋為越王侗記室兼侍讀侗稱制擢著作郎時
王世充將篡逆侗謂士季曰隋有天下三十年朝果無忠臣
乎士季對曰見危授命臣宿志也請因啓事為陛下殺之謀
洩停侍讀乃不克貞觀初終太學博士兼弘文館學士南金
仕為太常奉禮郎開元初少卿盧崇道抵罪徙嶺南逃還東
都南金居母喪崇道偽稱弔客入而道其情南金匿之俄為
讐人跡告詔侍御史王旭捕按南金當重法弟趙璧詣旭自
言匿崇道者我也請死南金固言弟自誣不情旭怪之趙璧
曰母未葬姊未歸兄能辦之我生無益不如死旭驚上狀明

皇皆宥之南金知書史履操謹完張說陸象先稱其賢由庫部員外以痼疾改太子洗馬卒

唐書 盧熊志曰南金嘗自奉禮郎為鄆令築堤為湖于

頃宋知州李夷庚葺為六梁四牖治平中立祠湖上之青山賜號嘉澤廟追封南金為孚佑侯夷庚為惠應侯

張旭

米芾書史云字伯高

吳人善草書嗜酒每大醉呼叫狂走乃下筆或以頭濡墨而書既醒自視以為神不可復得也世呼張顛初

仕為常熟尉有老人陳牒求判宿昔又來旭怒其煩責之老人曰觀公筆奇妙欲以藏家爾旭因問所藏盡出其父書旭

視之天下奇筆也自是盡其法旭自言始見公主擔夫爭道又聞鼓吹而得筆法意觀倡公孫舞劍器得其神後人論書

歐虞褚陸皆有異論至旭無非短者傳其法惟崔逸顏真卿

云文宗時詔以李白歌詩裴旻劍舞并旭草書為三絕

唐書寶

蒙述書賦注旭官至左率府長史

歸崇敬字正禮吳人治禮家學多識容典擢明經遭父喪孝聞

鄉里調國子直講天寶中舉博通墳典科對策第一遷四門

博士有詔舉才可宰百里者復策高等授左拾遺肅宗次靈

武再遷起居郎贊善大夫史館修撰兼集賢殿校理修國史

儀注以貧求解歷同州長史潤州別駕未幾有事橋陵建陵


召還參掌儀典改主客員外郎復兼修撰代宗幸陝召問得

失崇敬極陳生人疲敝當以儉化天下則國富而兵可用建

言禮制事皆施行大歷初授倉部郎中充弔祭冊立新羅使

海道風濤舟幾壞眾謀易單舸荅曰今共舟數十百人我何忍獨濟哉少選風息先是外國多齎金帛買所無崇敬囊橐惟衾衣東夷傳其清德還授國子司業兼集賢學士八年遣祀衡山未至而哥舒晃亂廣州監察御史憚之請望祀而還崇敬正色曰君命豈有畏邪遂往在職多所建議坐事貶饒州司馬二語本傳文繁從盧志酌易德宗立召還復拜國子司業稍遷翰林學士左散騎常侍充皇太子侍讀封餘姚郡公田悅李納稟命持節宣慰稱旨表歸上冢寵賜繪帛儒生以為榮遷工部尚書仍前職年老以兵部尚書致仕卒年八十八贈左僕射諡曰宣論撰十數篇唐書縣志載入長洲今從唐書本傳入吳縣

沈既濟吳人經學該明楊炎雅善之既執政薦既濟有良史才召拜左拾遺史館修撰初吳兢撰國史為則天本紀既濟議以為則天皇后進以強有退非德讓史臣追書當稱太后中宗宜稱皇帝不宜曰廬陵王請省天后紀合中宗紀議不行德宗立銳於治詔中書門下兩省分置待詔官三十權公錢收子贍用既濟諫事遂寢炎得罪既濟坐貶處州司戶參軍後入朝位禮部員外郎撰建中實錄時稱其能唐書初既濟官協律郎時嘗上選舉議極言當時銓法之弊德宗雖嘉其言而不能見選舉志魏信陵郡人貞元初進士及第六年為望江令有仁政撫孤獨為禱神請雨文有云必也私欲之求行於邑里慘黷之政施



於黎元令長之罪也神得而誅之豈可移於人而害其歲既卒官百姓留葬縣境至今有祠宋崇寧四年敕賜靈施廟信

陵故居在吳縣包山

盧熊蘇州志

于公異吳人登進士第文章精拔為時所稱建中末為李晟招討府掌書記興元元年收京城公異為露布上行在云臣已肅清宮禁祇奉寢園鐘簾不移廟貌如故德宗覽之泣下不自勝左右為之嗚咽既而曰不知誰為之或對曰于公異之詞也上稱善久之公異初應進士時與舉人陸贄不協至是贄為翰林學士聞上稱與尤不悅時議者言公異少時不為後母所容自遊宦成名不歸鄉里及貞元中贄為宰相奏公

異無素行黜之詔放歸田里公異竟名位不振輒軻而卒人

士惜其才惡贄之褊急焉

舊唐書

歸登字冲之崇敬子事繼母篤孝大歷中舉孝廉高第貞元初策賢良為右拾遺裴延齡得幸德宗欲遂以為相右補闕熊執易疏論之以示登登動容曰願竄吾名雷霆之下君難獨處故同列有所諫正輒聯署無所回諱轉右補闕起居舍人凡十五年僚吏有出其下而進趨自喜得顯官惟登退然遠權勢終不以淹晚槩懷遷兵部員外郎順宗為皇太子登父子侍讀及即位以東宮恩超拜給事中遷工部侍郎復為皇太子諸王侍讀獻龍樓箴以諷徙左散騎常侍入謝憲宗問

政所先登知帝睿而果於斷勸順納諫諍外傳為讜言後判國子祭酒事進工部尚書累封長洲縣男卒贈太子少師諡曰憲登性溫恕家僮為馬所蹠笞折馬足登知不加責有遺金石不死藥者給曰已嘗及登服之幾死訊之乃未之嘗人皆為怒而登不為愠常慕陸象先為人世亦許其類云

唐書舊

唐書云登有文學工草隸

陸長源字泳之餘慶孫贍於學始辟昭義薛嵩幕府嵩侈汰常從容規切歷建信二州刺史韓滉兼領江淮轉運辟署兼御史中丞以為副入遷都官郎中復出為汝州刺史時宣武軍士素驕怙亂帝恐節度使董晉儒懷拜長源為司馬以佐之

長源初欲峻法繩驕兵為晉所持不克行而判官楊凝孟叔度等又苛細淫縱晉有所偷弛長源輒裁正之晉卒長源總留後事大言曰將士久慢吾且以法治之眾懼長源性剛不適變又不為備才八日軍亂殺長源及叔度等死之日有詔拜節度使遠近嗟悵贈尚書左僕射長源諸易無威儀而清白自將去汝州送車二乘曰吾祖罷魏州荀車一乘而圖書半之吾愧不及先人云

唐書

顧少連字夷仲吳人舉進士為禮部侍郎薛邕所器擢上第以拔萃補登封主簿邑有虎孽少連命塞陷奔移文嶽神虎不為害御史大夫于頔薦為監察御史德宗幸奉天徒步詣謁

授水部員外郎翰林學士再遷中書舍人閱十年以謹密稱
歷吏部侍郎裴延齡方橫無敢忤者嘗與少連會田鎬第酒
酣少連挺笏曰段秀實笏擊賊臣今吾笏將擊奸臣奮且前
元友直歡解之改京兆尹政尚寬簡不爲灼灼名先是京畿
租賦薄厚不能一少連以法均之遷吏部尚書封本縣男徙
兵部爲東都留守表禁苑及閑田募耕以便民閱武力利鎧
仗號良吏卒贈尚書右僕射諡曰敬始少連攜少子師閔奔
行在有詔同止翰林院車駕還授同州參軍

唐書

陸質字伯冲七代祖澄仕梁爲名儒世居吳明春秋師事趙匡
匡師啖助質盡傳二家學陳少游鎮淮南表在幕府薦之朝

授左拾遺累遷左司郎中歷信台二州刺史質素善韋執誼
用其力召爲給事中憲宗爲太子詔侍讀質本名淳避太子
名故改時執誼懼太子怒已專故以質侍東宮陰伺意解釋
之質伺間有所言太子輒怒曰陛下命先生爲寡人講學何
可及他質惶懼出執誼未敗時質病甚太子已卽位爲臨問
加禮卒門人以質能文聖人書通於後私共諡曰文通先生
所著書甚多行於世

唐書

施士句吳人明毛鄭詩兼善左氏春秋以二經教授由四門助
教爲博士秩滿當去諸生封疏乞留凡十九年卒於官弟子
共葬之

唐書

張籍字文昌

本傳和州烏江人張洎第進士為太常寺太祝久張司業集序蘇州吳人

次遷秘書郎韓愈薦為國子博士歷水部員外郎主客郎中

當時有名士皆與游而愈賢重之籍為詩長於樂府多警句

仕終國子司業

唐書宋鄱陽湯中曰按唐史所載司業為和州烏江人而王荆公詩乃云蘇州司業詩

名老二說異同然考之昌黎集張中丞傳後序云元和二年愈與吳郡張籍同閱家中舊書則信其為吳人矣但與孟東野書又有張籍在和州居喪家甚貧之語當是司業生於吳而嘗居於和故唐史誤以為和人也司業詩中寄蘇州白使君云登第早年同座主題詩今日是州民蓋用晉人簡帖中二字韋蘇州所謂敬共尊邵守賤簡具州民是也故司業以此施之樂天其寄和州使君劉夢得則云送客頻過沙口店看花多上水心亭不過記其常所宴游之地而無復敬共桑梓之意即此觀之益信司業之為吳人唐史之說不必惑云
盧熊曰籍本集有贈陸暢詩共踏長安街裏塵吳州獨作未歸身胥門舊宅今誰住君過西塘與問人則為蘇人無疑也

沈傳師字子賢既濟子材行有餘能治春秋工書法少為杜佑

所器貞元末舉進士擢第禮部侍郎權德輿門生七十人推

傳師為顏子復登制科授太子校書郎累遷知制誥入翰林

為學士改中書舍人翰林缺承旨次當傳師穆宗欲面命辭

曰學士院長參天子密議次為宰相臣自知必不能願治人

一方為陛下長養之因稱疾出穆宗遣中使敦召終不出遂

以本官兼史職俄出為湖南觀察使即官下修憲宗實錄寶

歷二年入拜尚書右丞復出為江西觀察使徙宣州傳師於

吏治明吏不敢罔慎重刑罰每斷獄召幕府平處輕重盡合

乃論決所泄以廉靖聞入為吏部侍郎卒年五十九贈尚書

傳師性夷粹無競更二鎮十年無書賄入權家初拜官宰相欲以姻私託幕府者傳師拒曰誠爾願罷所授故其僚佐極當時選治家不威嚴閨門自化兄弟子姓屬無親疎衣服飲食如一帑無儲錢鬻宅以葬

唐書

陸暢字達夫早有才名舉進士以秘書丞爲觀察判官張咨宗薦其植性謹和洩事周敏剖斷公事人人不寃乞賜章服初王仲舒刺洪州暢在幕府終日長吟不親公牘仲舒微言竟拂衣去及登省署遇雲陽公主出降詔爲催妝詩恩例外別賜宮錦五十段楞伽瓶及唾盃各一枚又爲劍南西川節度韋臯所厚禮始天寶間李白爲蜀道難篇以忤嚴武暢更爲

蜀道易以美臯臯向在蜀數進兵器上刻定秦字旣死人以

此誣臯暢上疏言臣在蜀日見定秦乃造兵器匠姓名耳由

是得釋

盧志本唐書全唐詩話等書

陸亘字景山吳人元和三年策制科中第補萬年丞遷太常博士禮史孟眞練容典博士降色訪逮史倚以倨橫會將冊皇太子草儀眞參議偃蹇亘榜逐之胥曹失色累遷戶部郎中太常少卿歷兗蔡虢蘇四州刺史浙東觀察使徙宣歙太和八年卒年七十一贈禮部尙書亘文明嚴重所到以善政稱初爲兗州對延英具陳節度分兵屯屬州刺史不能制故易亂帝因詔屯士得隸刺史溫州瀕海經賊亂奪官吏半祿代

民租後相沿更以爲姦亘還官全稟繩賊罪吏畏而賴之唐書

丁公著字平子吳人三歲喪母七歲見鄰媪抱子哀感不肯食請於父緒願絕粒學道父聽之稍長父勉救就學舉明經高第授集賢校書郎不滿秩輒去侍養於家父喪負土作冢貌力癯瘠見者憂其死孝觀察使薛苹表上至行詔刺史弔問賜粟帛旌其閭淮南節度使李吉甫表授太子文學兼集賢校理會入輔政擢右補闕遷直學士充皇太子諸王侍讀因著太子諸王訓十篇穆宗立召居禁中條詢治理且許以相公著陳讓牢切乃擢給事中遷工部侍郎知吏部選事公著知帝欲進用故辭疾求外授浙西觀察使徙河南尹治以清

靜聞四遷禮部尚書翰林侍講學士長慶中浙東災癘拜觀察使詔賜米七萬斛使振饑民久之入爲太常卿太和中以病丐還鄉里卒贈尚書右僕射公著清約守道每進一官輒憂見顏閒四十喪妻終身不畜妾及卒天下惜之唐書

歸融字章之登子元和中及進士第累遷左拾遺事文宗爲翰林學士進戶部侍郎開成初拜御史中丞湖南觀察使盧周仁取羨錢億萬進京師融劾奏周仁違詔希恩請還所進代貧民租入詔置錢河陰院以虞水旱遷京兆尹李固言爲相惡之徙秘書監固言罷擢權知兵部侍郎出爲山南西道節度使徙東川還歷兵部尚書累封晉陵郡公會昌後儒臣少

朝廷禮典多本融議辭疾以太子太傅分司東都大中七年

卒贈尚書左僕射

唐書 舊書子仁晦仁翰仁憲仁紹仁澤皆登進士第咸通中並至達官

沈詢字誠之傳師子能文辭會昌初第進士補渭南尉累遷中

書舍人出為浙東觀察使咸通四年為昭義節度使治尚簡

易人皆便安奴私侍兒詢將戮之奴懼結牙將為亂夜攻詢

滅其家贈兵部尚書劉潼代為節度馳至刳奴心祭其靈坐

唐書

陸希聲景融四世孫博學善屬文通易春秋老子論著甚多商

州刺史鄭愚表為屬後去隱義興久之召為右拾遺見州縣

刳敵上言當謹視盜賊明年王仙芝反株蔓數十州遂不制

擢累歙州刺史昭宗聞其名召為給事中拜戶部侍郎同中

書門下平章事以太子少師罷李茂貞等兵犯京師輿疾避

難卒贈尚書左僕射諡曰文

唐書 唐詩紀事曰古之善書鮮有得筆法者希聲得之凡五

字擬押鉤格抵謂之撥鐙法希聲自言昔二王皆傳此法至

陽冰亦得之希聲以授沙門詈光光後入為翰林供奉引薦

希聲遂至宰相

徐修矩

皮日休二游詩序曰吳之士有恩王府參軍徐修矩者守世書萬卷優游自適余假其書數千

卷未一年悉償夙志酣飲經史或日晏忘飲食有前涇縣尉

任晦者其居有深林曲沼危亭幽砌余退公之暇必造以息

焉林泉隱事恣用研詠大凡游於二君宅無淡旬之間因作詩以留贈名之曰二游

孫發吳人嘗舉百篇科皮日休贈以詩云百篇宮體噎金屋一

日成其見推當時如此中吳紀聞

諸志唐時人物有陸展按展先世徙家陝州猶陸通陸逞之無與於吳也又諸志文苑內載唐詩人顧况考他書况乃蘇之海鹽人今屬嘉興府舊皆誤收故去之

五代


司馬福郡人始隸吳越王水軍為游奕都虞候開平三年淮人圍姑蘇置柵環城內外阻絕王遣救兵至莫知城中音問福能水中行總帥因遣人城淮人設網懸銅鈴織鱗過之必覺福以巨竹觸網淮人聞鈴聲舉網網舉而得度或浮水上則戴萍苻而行因得入城既而復出凡在水中三日及救兵與城中弓矢相應淮人以為神軍中皆服福奇才進官都指揮

使吳越王城吳江置軍鎮命福主之遂老於職吳越備史

溫訥郡人為楊行密將劉威幕客行密卒威為帥府所忌或譖於徐溫溫將害之訥說威曰公受謗雖深反本無狀若輕舟入覲則嫌疑皆亡矣威從之溫果待威甚恭威得還鎮訥之力也吳郡志

皮光業字文通父曰休為蘇州從事光業生於蘇十歲能屬文錢鏐辟以為屬吳越國建以為相教令儀注多其所定美容儀喜談論若神仙中人吳越備史盧志引尹師魯所撰皮子良墓誌云曾祖曰休依錢氏官太常博士祖光業丞相父璨元帥府判官三世皆以文雄江東

蔣詒恭吳人流落入蜀性耿直有逸才每一吟咏率多諷刺時



蜀主季年臣僚多尚權勢侈敖無節因為詩以諷蜀主曰敢言之士也特授名山令又善蒞事賜銀緋姑蘇志

宋

盧王諸志宋朝人物首列宋初武臣楊崇勳攷宋史本傳崇勳乃薊人東都事略則作蘇人然吳郡志中吳紀聞等書俱不載其非蘇人無疑蓋字相近而訛耳

許洞字洞天吳縣人父仲榮太子洗馬致仕洞性疎雋幼習弓矢擊刺之技及長折節厲學尤精左氏傳咸平三年進士釋褐雄武軍節度推官嘗詣府白事有卒踞坐不起即杖之又移書責知州馬知節知節怒其不遜會洞輒用公錢奏除名歸吳中數年日以酣飲為事中吳紀聞洞所居惟植一竹以表特立之操吳人至今稱之曰

許洞門前一竿竹

景德二年獻所撰虎鈴經應洞識韜略運籌決勝

科以負譴報罷就除均州參軍大中祥符四年祀汾陰獻三盛禮賦召試中書改烏江主簿卒年四十二有集一百卷春

秋釋幽五卷演元十卷

宋史

盧志宋初吳人有舒雅太平興國中奉詔修書以職方員外郎知舒州秩滿主管郡之靈仙觀即宋史文苑傳所載之舒雅也但宋史不言何處人中吳紀聞吳郡志俱不載疑盧志誤故去之

許式字叔矜祖延祚為常熟令遂家於吳式舉進士有高行名著雍咸間歷通判博州尚書祠部郎中知洪筠二州官至轉運使年八十餘猶強健贈禮部尚書盧志

謝濤字濟之其先自陽夏徙富陽父崇禮為中吳軍節度推官

故為蘇人

已上見盧熊志宋史謝絳傳但云其先陽夏人祖懿文為鹽官令葬富陽遂為富陽人范仲淹撰神

道碑則云及冠居姑蘇郡濤幼奇敏講學陽山澄照寺吳令羅處約長洲

令王禹偁皆與定交處約謂禹偁曰濟之揚摧天人吾曹敵

也淳化三年擢進士第

已上見神道碑及吳郡志

為梓州權鹽院判官李

順反成都濤畫守禦之計以功遷觀察推官權知華陽縣亂

亡後田廬荒廢詔有能占田而倍入租者與之於是腴田悉

為豪右所占流民至無所歸濤收詔書悉以田還主改著作

佐郎知興國軍以治行召對長春殿命試學士院會契丹入

寇真宗議親征時曹濮多盜而契丹聲言趨齊鄆以濤知曹

州嘗使蜀還舉所部官三十餘人宰相疑其多濤曰有罪願

連坐奉使舉官連坐自濤始久之用馮拯薦復召試以尚書

兵部員外郎直史館兼侍御史知雜事真宗山陵靈駕所經

道路有司請悉壞城門廬舍以過車輿象物濤言先帝車駕

封祀儀物大備猶不聞有所毀撤且遺詔從儉薄今有司治

明器侈大以勞州縣非先帝意願下少府裁損之累官西京

留司御史臺遷太子賓客

已上宋史謝絳傳

富巖處州青田人其祖居吳而葬因占籍焉巖於丞相弼為叔

父登大中祥符四年第慶歷初由三司戶部判官除刑部郎

中知蘇州四年改兵部知泉州八年以太常少卿知越州嘉

祐中以秘書監再守蘇秩滿致仕未嘗一造官府以耆德著

稱鄉人因名其居曰德壽坊子臨亦有文名終知池州

吳郡志盧

志合纂

謝絳字希深濤子以父任試祕書省校書郎舉進士中甲科知汝陰縣善議論喜談時事嘗論四民失業累數千言楊億薦絳文章召試擢祕閣校理同判太常禮院仁宗卽位遷太常博士尋出通判常州天聖中天下水旱蝗起河決滑州絳上疏願下詔引咎罷不急之役省無名之斂勿崇私恩更進直道仁宗嘉納之會修國史以絳爲編修官史成遷祠部員外郎直集賢院時濤官西京且老矣因請便養通判河南府絳雖在外猶數論事還權開封府推官言蝗亘田野全入郭郭

願博訪理官除煩苛損聚斂勿起大獄勿用躁人會郭皇后廢絳陳詩白華引申后褒姒事以諷辭甚切至徙三司度支判官再遷兵部員外郎言邇來用物滋侈賜予過制宜裁節初詔罷織密花透背禁勿復用旣而賜內人衣復取於有司又後苑作器索龜筒龜筒禁物民間不得有而索之不已絳皆論罷之又請罷內降詔令皆由中書樞密然後施行因進聖治箴五篇以父憂去服除擢知制誥判禮部流內銓太常禮院使契丹還請知鄧州卒年四十六絳以文學知名一時爲人修潔醞藉所至大興學舍嘗請諸郡立學在河南修國子學教諸生自遠而至者數百人好施宗族喜賓客卒之日

家無餘貲有文集五十卷宋史子景初字師厚慶歷六年甲科

及第以大理評事知餘姚縣始作海塘防水患累遷益州路

提點刑獄以屯田郎致仕性倜儻勁峭博學能文尤長於詩

為歐陽修梅堯臣王安石所推重女壻黃庭堅自謂從謝公

得句法弟景平字師同以蔭試秘書省校書郎守將作監主

簿中進士第簽判崇信軍監楚州西河轉般倉好學著詩書

傳說數十卷終秘書丞弟景回字師復幼好學年十九所為

文辭已可傳以疾卒

盧志

范仲淹字希文唐宰相履冰之後其先邠州人也後徙蘇州吳

縣仲淹二歲而孤母更適長山朱氏從其姓名說少有志操

既長知其世家迺感泣辭母去之應天府依戚同文學晝夜

不息冬月憊甚以水沃面食不給至以糜粥繼之人不能堪

仲淹不苦也舉進士第

墓誌云祥符八年

為廣德軍司理參軍迎

母歸養改集慶軍節度推官始還姓更今名監泰州西溪鹽

稅遷大理寺丞徙監楚州糧料院母喪去官晏殊知應天府

聞仲淹名召寘府學上書請擇郡守舉縣令斥游惰去冗僭

慎選舉撫將帥凡萬餘言服除以殊薦為秘閣校理仲淹汎

通六經長於易學者多從質問為執經講解無所倦嘗推其

俸以食四方游士諸子至易衣而出晏如也每感激論天下

事奮不顧身一時士大夫矯厲尚風節自仲淹倡之天聖七

蘇州府志 卷四十九
年章獻太后將以冬至受朝天子率百官上壽仲淹曰奉親於內自有家人禮顧與百官同列而朝之不可爲後世法又上疏請太后還政不報尋通判河中府徙陳州時方建太一宮及洪福院市材木陝西仲淹言昭應壽寧天戒不遠宜罷修寺觀減常歲市木之數以蠲除積負又言恩倖多以內降除官非太平之政事雖不行仁宗以爲忠太后崩召爲右司諫言事者多暴太后時事仲淹曰太后受遺先帝調護陛下者十餘年宜掩其小故以全后德帝爲詔中外母輒論太后時事初太后遺詔以太妃楊氏爲皇太后參決軍國事仲淹曰太后母號也自古無因保育而代立者今一太后崩又立

一太后天下且疑陛下不可一日無母后之助矣歲大蝗旱江淮京東滋甚仲淹請遣使循行未報乃請開曰宮掖中半日不食當何如帝惻然乃命仲淹安撫江淮所至開倉振之且禁民淫祠奏蠲廬舒折役茶江東丁口鹽錢且條上救敝十事會郭皇后廢率諫官御史伏閣爭之不能得明日將留百官揖宰相廷爭方至待漏院有詔出知睦州歲餘徙蘇州拜尚書禮部員外郎天章閣待制召還判國子監遷吏部員外郎權知開封府時呂夷簡執政進用者多出其門仲淹上百官圖指其次第曰如此爲序遷如此爲不次如此則公如此則私况進退近臣凡超格者不宜全委之宰相夷簡不悅

他日論建都事仲淹曰洛陽險固而汴爲四戰之地太平宜居汴有事必居洛陽帝問夷簡夷簡曰此仲淹迂闊之論也仲淹乃爲四論以獻大抵譏切時政且曰漢成帝信張禹不疑舅家故有新莽之禍臣恐今日亦有張禹壞陛下家法夷簡怒訴曰仲淹離間陛下君臣所引用皆朋黨也仲淹對益切由是罷知饒州徙潤州又徙越州元昊反召爲天章閣待制出知永興軍改陝西都轉運使會夏竦爲陝西經略安撫招討使進仲淹龍圖閣直學士以副之夷簡再入相帝諭仲淹使釋前憾仲淹頓首謝曰臣向論蓋國家事於夷簡何憾也延州諸砦多失守仲淹自請行兼知延州大閱州兵得萬

八千人分爲六各將三千人分部教之量賊衆寡使更出禦賊時塞門承平諸砦旣廢用种世衡策城青澗以據賊衝大興營田請建鄜城爲康定軍明年正月詔諸路入討仲淹曰正月塞外大寒我師暴露不如俟春深入賊馬瘦人飢勢易制也况邊備漸修師出有紀賊雖猖獗固已懾其氣矣鄜延密邇靈夏西羌必由之地也第按兵不動以觀其釁許臣稍以恩信招來之若臣策不效當舉兵先取綏宥據要害屯兵營田爲持久計則茶山橫山之民必挈族來歸矣拓疆禦寇策之上也帝皆用其議仲淹又請修承平永平等砦稍招還流亡定保鄣通斥候城十二砦於是羌漢之民相踵歸業久

之元昊歸陷將高延德因與仲淹約和仲淹爲書戒諭之會
任福敗於好水川元昊荅書語不遜仲淹對來使焚之大臣
以爲不當輒通書又不當輒焚之降知耀州徙慶州遷左司
郎中爲環慶路經略安撫緣邊招討使初元昊反陰誘屬羌
爲助而環慶酋長六百餘人約爲鄉導事尋露仲淹以其反
覆不常至部卽奏行邊以詔書犒賞諸羌閱其人馬爲立條
約諸羌皆受命自是始爲漢用改邠州觀察使辭不拜慶之
西北馬鋪砦當後橋川口在賊腹中仲淹欲城之度賊必爭
密遣子純佑與蕃將趙明先據其地引兵隨之諸將不知所
向行至柔遠始號令之版築皆具旬日而城成卽大順城是

也賊覺以騎三萬來戰佯北仲淹戒勿追已而果有伏大順
旣城而白豹金湯皆不敢犯環慶自此寇益少明珠滅臧勁
兵數萬仲淹聞涇原欲襲討之上言曰二族道險不可攻討
之必與賊表裏若北取細腰葫蘆衆泉爲保障以斷賊路則
二族安而環州鎮戎徑道通徹可無憂矣其後遂築細腰胡
蘆諸砦葛慎敏敗於定川賊大掠至潘原關中震恐仲淹率
衆六千由邠涇援之聞賊已出塞乃還始定川事聞帝按圖
謂左右曰若仲淹出援吾無憂矣奏至帝大喜曰吾固知仲
淹可用也進樞密直學士右諫議大夫時已命文彥博經略
涇原帝用仲淹言復置陝西路安撫經略招討使以仲淹韓

琦龐藉分領之仲淹與琦開府涇州而徙彥博帥秦宗諒帥慶張亢帥渭仲淹爲將號令明白愛撫士卒諸羌來者推心接之不疑故賊亦不敢輒犯其境元昊請和召拜樞密副使改參知政事帝方銳意太平數問當世事仲淹語人曰上用吾至矣事有先後久安之弊非朝夕可革也帝再賜手詔又爲之開天章閣召二府條對仲淹惶恐退而上十事曰明黜陟抑僥倖精貢舉擇長官均公田厚農桑修武備推恩信重命令減徭役天子方信嚮仲淹悉采用之宜著令者皆以詔書畫一頒下初仲淹以忤呂夷簡放逐者數年士大夫持二人曲直交指爲朋黨及陝西用兵天子以仲淹士望所屬援

用之及夷簡罷召還倚以爲治中外想望其功業而仲淹以天下爲已任裁削倖濫考覈官吏日夜謀慮興致太平然更張無漸規模闊大論者以爲不可行及按察使出多所舉劾人心不悅自任子之恩薄磨勘之法密僥倖者不便於是謗毀稍行而朋黨之論浸聞上矣會邊陲有警因與樞密使富弼請行邊於是以前仲淹爲河東陝西宣撫使賜黃金百兩悉分遺邊將麟州新羅大寇言者多請棄之仲淹爲修故砦招還流亡三千餘戶蠲其稅罷權酷予民又奏免府州商稅河外遂安比去攻者益急仲淹亦自請罷政事迺以爲資政殿學士陝西四路宣撫使知邠州其中書所施爲亦稍稍沮

罷以疾請鄧州進給事中徙荆南鄧人遮使者請留仲淹亦願留鄧許之尋徙杭州再遷戶部侍郎徙青州會疾甚請穎州未至卒年六十四贈兵部尚書諡文正初仲淹病帝遣使賜藥存問既卒嗟悼久之又遣使就問其家既葬帝親書其碑曰褒賢之碑仲淹內剛外和其於富貴貧賤毀譽歡戚一不動其心而慨然有志於天下嘗曰先天下之憂而憂後天下之樂而樂其事上遇人一以自信不擇利害為趨舍自其貴至趨舍一段參用歐陽修神道碑性至孝以母在時方貧後雖貴非賓客不重肉妻子衣食僅能自充而好施與置義莊里中以贍族人汎愛樂善士多出其門雖里巷之人皆能道其名字死之日

四方聞者皆為歎息為政尚忠厚所至有恩諸蕃質子縱其

出入無一人逃者蕃酋來見召之臥內徹衛與語自諸蕃至與語一段

參用神道碑邠慶二州之民與屬羌皆畫像立生祠事之及卒羌

酋數百哭之如父齋三日而去四子純佑純仁純禮純粹宋史

家傳云元祐中贈太師中書令兼尚書令追封楚國公靖康初詔追封魏國公

錢象先字資元蘇州人進士高第呂夷簡薦為國子監直講歷

權大理少卿度支判官河北江東轉運使召兼天章閣侍講

詳定一路敕成當進勳爵仁宗以象先母老欲慰之獨賜紫

章服進待制知審刑院加龍圖閣直學士刑部侍郎出知蔡州

象先長於經術侍邇英十餘年有所顧問必依經以對反復

諷諭遂及當世之務禮遇甚渥故事講讀官分日迭進象先
已得蔡帝猶諭之曰大夫行有日矣宜講徹一編於是同列
罷進者浹日徙知河南府陳州復兼侍講知審刑院象先旁
通法家說故屢爲理官條令多所裁定嘗以爲犯赦者重犯令
者輕請移敕文入令者甚衆又議告捕法以爲罪有可去有
可捕苟皆許捕則姦人將倚法以害善良因削去許捕百餘
事其持心平恕類此復知許潁陳三州以吏部侍郎致仕卒
年八十一

宋史

鄭戩字天休吳縣人早孤力學客京師事楊億以屬辭知名舉
進士擢中科授奉禮郎簽書寧國軍節度判官事召爲集賢

校理通判越州還改太子中允同知太常禮院升直史館三
司戶部判官同修起居注以右正言知制誥判國子監徙知
審刑院遷起居舍人龍圖閣直學士權知開封府吏馮士元
爲姦利有告士元受賕藏禁書者戩窮治之辭連宰相呂夷
簡知樞密院盛度參知政事程琳遂逮捕夷簡子公綽公弼
參劾其狀旣而士元流毒島度琳坐嘗交關士元罷去其餘
黜罰者孔道輔龐籍又十餘人朝議畏其敷核戩敏強善聽
決獨假貸細民卽豪宗大姓繩治益急政有能迹徙權三司
使以右諫議大夫同知樞密院改樞密副使爲呂夷簡所忌
罷以資政殿學士知杭州發丁夫數萬闢錢塘湖民賴其利

徙鄆州又徙永興軍先是衙吏輸木京師浮渭泛河多漂沒
既至則斥不中程往往破家不能償戢奏歲減二十餘萬長
安故都多豪惡戢治之尚嚴人皆惕息未幾爲陝西四路都
總管兼經略安撫招討使駐涇州聽便宜從事遷尙書禮部
侍郎行邊至鎮戎軍趣蓮花堡天寒與將佐置酒元昊擁兵
近塞會暮塵起有報敵騎至者戢曰此必三州將按邊回非
敵騎也已而果然及疆事少寧詔還知永興軍初靜邊砦主
劉滬謀築水洛結公二城以通秦渭援兵招生羌大王族爲
邊衛使滬與董士廉督其役會罷戢四路安撫使韓琦知渭
州尹洙皆以爲不便召滬士廉罷役歸不聽乃械送德順軍

獄戢力爭於朝卒城之進戶部侍郎資政殿大學士知并州
契丹與元昊方交兵邊奏互上獨戢不以聞詔遣使問其故
戢對曰敵自相攻中國不足憂也遷吏部侍郎改宣徽北院
使拜奉國軍節度使卒贈太尉諡文肅戢遇事果敢必行然
憑氣近俠用刑峻深士民多怨之

宋史

吳感字應之以文詞知名天聖二年省試第一九年中書判拔

萃科仕至殿中丞子純文行亦高鄉人目曰吳先生

吳郡志

范琪字希世仲淹從兄祖從誼吳越蘇州糧料判官父昌言宋
寧國軍節度推官贈國子博士琪天聖五年進士歷鄱陽保
信軍廬州二從事葉清臣舉充茶官授開封府法曹議讞必

精握節不撓以府尹胥安道給事中孫夢得薦改大理寺丞
知鄞縣葺堰埭百餘決導瀦積轉運安撫司各條其治狀舉
簽本州幕遷殿中丞太常博士知常熟縣濬金涇鶴瀆二浦
溉田千頃爲公家利除尙書屯田員外郎通判泰州未上卒
累贈金紫光祿大夫

盧志

范仲溫字伯玉仲淹仲兄幼孤自京師還蘇與諸從兄弟居勤
業孝弟景祐二年以仲淹恩例補將作簿調越州新昌尉在
邑三年盜不及境監杭州餘杭縣市征除寧海軍節度推官
知台州黃巖縣海潮壞州城人皆逃散沒溺者甚衆仲溫教
民爲桴晝夜救之全活數千人旣而董衆治城謂人築且勞

甍不能久乃集民累土以牛數百蹂之堅而後增復表以長
石互相銜枕勢莫得動門皆設闢遇水暴至則障之衆伏其
善台人遂安秩滿還家遂請老遷太子中舍致仕卒年六十

六

范仲淹太子中舍范府君墓誌

范師道字貫之琪子

宋史作長洲人

進士及第爲撫州判官知廣德縣

縣有張王廟民歲祀神殺牛數千師道禁絕之通判許州累
遷都官員外郎吳育舉爲御史奏請罷內降推恩擇宰相久
其任選宗室賢者養宮中備儲貳初皇祐中賈昌朝上議置
五輔郡設京畿轉運使提點刑獄師道力奏非便遂復舊制
又以四年貢舉士苦淹久請易爲三年宰相劉沆護葬溫成

蘇州府志 卷四十一
皇后禮官議稱陵師道以爲非典制沆惡之出知常州臺諫
官共言師道不當去不報徙廣南東路轉運使召爲鹽鐵判
官道改兩浙轉運使遷起居舍人同知諫院管勾國子監後
官周氏董氏生公主諸閤女御多遷擢師道上疏謂陛下寵
幸太過恩澤不節恐斜封墨敕復見今日遷兵部員外郎兼
侍御史知雜事判都水監數奏樞密副使陳升之不當用升
之罷師道亦出知福州頃之以工部郎中入爲三司鹽鐵副
使感風眩遷大中大夫戶部直龍圖閣知明州卒師道居官
厲風操前後在言路有聞卽言如陳執中家人殺婢卒坐免
奪王拱宸宣徽使李淑翰林學士及王德用程戡領樞密宦

官石全彬閤士良升進皆奏數其罪

以上宋史

及請士大夫終葬

始得從仕立限田以均民產抑貪墨以清守令崇私廟以廣
孝治擇知典故近臣以任禮樂之官減色役以恤困窮之力
皆天下急務有奏議二十卷文集五十卷嘗爲唐詩史著君
臣治忽之迹藏之秘閣子世京字延祖皇祐五年進士補柘
城主簿遷歷陽令適師道守明州世京棄官侍養父喪扶護
歸鄉垢面跣足晝夜哀號行路爲之隕涕服除改著作郎知
海鹽縣治聲動浙右熙寧初召爲管勾湖北廣惠倉時朝廷
銳意改作論不合辭歸詔授秘書丞致仕

以上盧志


陳之奇字虞卿其先長安人唐末徙吳曾祖贊明吳越中吳軍

節度推官祖郁贈太子贊善大夫父質殿中丞以德行著稱鄉里贈刑部侍郎之奇天聖中禮部試第四廷試下第里居十年無仕進意其母丁謂妹也謂欲授以官之奇有兄郢亦以琴書自怡皆力辭後勉使應舉不得已又以進士爲鄱陽尉歷丹徒泰興二縣令李瑋尙秦國大長公主詔舉經術行義者爲隴西郡王宅教授數月告歸卽致仕時年未五十郡留其奏不可遷太子中允俄除平江軍節度掌書記復以爲教授詔賜金錢促遣之卒不起以太常博士賜緋魚袋閒居十八年之奇孝於親約於身信於朋友好學知道其心泊如不爲聲利所遷與鄉人同憂樂赴人之急至於州縣無所避

平居靜默與人言忠孝立身疊疊不倦人莫不以爲君子每出乘羸駒里巷小人見之必斂然曰此吾陳君子也四方賢士大夫至吳必問所在爭欲見之當是時胡瑗以經術教授諸生蘇舜欽以文章退居山林之奇以德行棄官而歸稱吳下三賢熙寧初卒王珪爲誌題曰太常博士致仕陳君子之

墓

中吳紀聞吳郡志盧志合纂



蘇州府志卷第四十九

文化乙丑

